

長蘆鹽法志

長茂鹽法志卷十五

奏疏

奏疏上 奏疏下

長蘆密邇京畿應無壅於

上聞之事矧夫鹽筴僅政之一端支運有常規奏銷有定額
用連章累牘哉然國計攸關民食所繫有不容於膜視者
如雨場灘漲積逋私販滯引融銷商竈之情形一一得所
調劑而敷陳之上以承

德意之周詳下以體羣情之利病者胥視諸此矣志奏疏

奏疏上

順治元年七月詹事府舍人王國佐條奏鹽政十弊疏。一革防銷以省商費。查鹽勛掣銷自有定額。無容私自增減。今據稱每引新增防銷鹽數勛。每勛納銀五釐。殊屬非法。嗣後每引連包索二百二十五勛外。多帶者卽繫私鹽。查出官商一體治罪。一除淫贖以伸商冤。查罰贖所以警奸。今據稱無故誅求。按引加贖。屬商爲甚。應令鹽臣嚴加釐剔。如有正額外私派私徵者。必置重典。不宥。一止變價以止奸欺。查私鹽變價。繫明朝舊制。今據稱變價之鹽。比引倍重。價賣更輕。是以奸徒俱以運到之鹽。串通書吏。假充私

鹽變價名色。告運貨賣。不由掣放。故夾帶不可窮詰。正引
壅滯。且借貢鹽腳價助餉名色。上下朦奸。而無歸著。議令
所獲私鹽。必報明臣部。鹽院積堆總數。給商納價。領引運
賣。一如正額鹽。但所納變價課銀。不許摺入正額之內。
每年彙算清楚。除貢鹽腳價外。仍行解部充餉。一清焚溺
以杜虛冒。查行鹽遭水沈溺。或火焚燬者。準令買補。奈法
久弊生。以無報有。以寡冒多。莫可究詰。以後遇有商鹽焚
溺。必取地方官印結。申報部院運司。察有實據。方準買補。
查出捏報罪坐。出結官。官商各知警惕。一止改告。以一鹽

引查行鹽立有水程。所以定境界。杜攙越也。今據稱商通奸吏。鹽到發完。買回水程。不書註銷。假捏地方壅滯。另註地方告運貨賣。是一引而行兩鹽。誠爲虧課滋弊。以後運司先將水程填註明白。銷完仍同引目繳部。不許改告。一疏關禁以通引楫。查設關譏察。原爲扼私販通官運也。今據稱天津海口一關私鹽重賄巡役。公行無忌。官鹽反行借端阻塞。請行革除。以免商害。至於自造鹽船。不得強掣運糧。合行嚴加申飭。一杜擾害以清私販。查官鹽壅多。故設番緝捕私裕公。今據稱私鹽橫行。捕役不敢與撻。反爲

羽翼惟挾私仇而攘搶富室善良畏懼爲害滋多是防奸者反爲叢奸矣嗣後如有通同挾仇妄報等弊重法究處一核場竈以清窩囤查商鹽出鹽原有定額惟私鹽窩囤販賣以致官鹽數少今責成各場大使每月將場竈出鹽數目據實開報運司間行查察如有隱匿卽治大使以通同之罪一復兩坨以備稽察查私鹽夾帶惟藉已掣之官鹽溷行堆坨今議已掣之鹽歸之舊坨未掣之鹽歸之新坨庶夾帶可杜一免徭助以濟孤商查鹽商爲

國辦課急公焉得再派雜役以重商困今宜一概除免一設

賞例以鼓富商。查商人自備資本。輸課濟餉。必須量爲鼓舞。以服其心。今議使老成行高者爲綱首。年次者爲副綱。責令查私鹽。搜隱弊。三年之內。果有成效。給以冠帶。副綱復爲綱首。則商不招而自至矣。部覆奉

旨依議。

順治三年。巡鹽御史柯士芳題奏。私鹽盛行。則官引壅塞。豪棍勾引東兵。非稱王府買用。則倚強搶奪。道司州縣秉法難施。商竈無控。乞

敕頒發清字禁止。

順治五年。御史金志遠題。長蘆運鹽。南所由陸。北所由水。其
來已久。近因土氛未靖。道路多梗。車牛闕乏。改南所亦由
水運。議定每船一隻。運司給票一張。填商名鹽數。并船戶
姓名。行至天津。赴北司照票查驗。放關。行至青縣鮑家嘴。
公河口。本司必委員驗實放行。每五日將放過鹽數。挨順
造冊查對。行至長蘆。照票進坵秤掣。給發引程。發賣部覆
議行。

順治十年。禮科給事中陳協題。各處行鹽地方。令商人立店
自賣。責成運司及州縣印官。嚴禁私販。疏通官引。不得散

派戶口累民部覆議行。

順治十五年鹽臣馬騰陞題開據商人王國隆等呈稱長蘆
運司舊商因明末加增繁劇俱已星散幸值我

朝定鼎寬恤招徠將明季一切浮增盡行削去題定經制每
年額引七十一萬九千五百五十引每引納課銀二錢六
分五釐七毫五絲每年共納銀十九萬一千二百餘兩隆
等聞風遠涉攜資辦課行鹽十有餘載陡於順治十二年
間鹽院王秉乾不遵

國制加增寧餉銀五千九十七兩又倒追十年以前寧餉銀

五萬六千餘兩。加增浮課銀九千五百餘兩。既爲浮課。而今又派贓罰銀三千三百兩。是誰贓罰。而今槩追。又追酬商銀一萬九千九百餘兩。向屬有名無實之銀。而今按引實追。課歸大部。滴珠銀已隨正課完納。而今倒追十年以前滴珠銀二萬三千七百餘兩。引既改爲七十一萬有零。開封等項名色俱在其中。而另追開封引價銀七千八百餘兩。如割沒銀兩。原因夾帶而始徵割沒。長蘆之鹽。非同淮浙。從無割沒之例。鹽院王秉乾按臨天津。下坵秤掣。坵不分新舊。鹽不分生熟。不用

欽頒法馬。反用私置小秤。以輕報重。懸坐割沒銀四萬五千兩。邀功。漸成陋例。加增十四年額引內。浮課等銀三萬六千四百餘兩。種種加派。倍於正課。商等有限之資膏。奚堪無窮之剝削。今又增存司備用引四萬五千引。又加新增引一十二萬引。行鹽止有此地。食鹽止有此人。引日增而鹽日寡。商日窮而課日逋。三年共計加增銀三十餘萬兩。隆等泣思商民均繫赤子。正賦拖欠在民者。十年以前。咸蒙赦免。至於寧餉滴珠。又非正課。十年以前。反行倒追。祈亟賜題請。

蠲新增之引目

救已往之橫徵。庶元氣少培。商等始有生路等情。查長蘆鹽法。自我

朝定鼎。削去浮增課歸大部。每歲定額七十一萬九千五百五十引。每引定課二錢六分五釐七毫五絲。遵行已久。迨至順治十二年間。前鹽臣題增割沒贓罰寧餉滴珠酬商浮課開封等項錢糧。又增存司備用引四萬五千引。又部題新增十二萬引。今除酬商浮課開封滴珠寧餉等五項名目。已蒙部覆總歸引內。無庸再議外。如割沒一項。蓋因各商所掣鹽包之內。有額外多築者。割其鹽而沒之。謂之

割沒。如贖罰一項。蓋因有割沒而始有贖罰。似難定額。至查存司備用引四萬五千引。明季將引發司存貯。以備各商支用。然後納課解部。謂之存司備用。今先責商赴部納課。而後領引行鹽。與存司備用之名似異。再加新增十二萬引。夫計口食鹽。一定之理。若食鹽之民不增。行鹽之地仍舊。則新增之引難。以疏銷。是以各商消乏。嘵嘵稱苦。爲今日計。似宜將存司四萬五千引發司備用。新增十二萬引之課銀。加於七十一萬九千五百五十引正課之內。所增之鹽。加於七十一萬九千五百五十引之包內。俾地

方易於疏銷。引課不致虧闕。至於帶徵滴珠寧餉二項。自元年起至十一年止。每年帶徵俱繫已往加增銀兩。年來各商存亡不同。消乏互異。辦課維艱。似應議蠲。部覆議新。增引課。加課而不加引。似屬未便。至於商人果否逃亡。並割沒贓罰。舊例作何秤課。請

敕巡鹽御史酌議妥確具奏。續據該鹽臣祖永傑覆稱。寧餉滴珠二項。在明季原非正課。今既加之引內。各商勉力輸納。無庸再議矣。而倒追節年之銀。屢催不能完納。查竈戶倒追邊布。已蒙題豁。商竈俱屬赤子。理難歧視。似應額

恩均蠲以甦商困。其新增一十二萬引。及存司備用四萬五千引。加之諸商。諸商告乏無已。鞭扑不前行之州縣。州縣告苦。頻聞催呼不應。良以蘆鹽疏銷之地。不過畿輔八府。與夫河南三郡。又緣我

朝定鼎以來。地多圈佔。民半遷逃。且連歲水旱薦臻。自十二年加課之後。蘆商死故逃乏。如王致和等。家產盡絕。不知所之。引額虛懸。全無著落。今議加課而不加引。是錢糧已增。引額照舊。上不訕於軍。

國下不病於民間。商賈無積壅之艱。州縣免考成之累。裕

國蘇商利害灼著。至於割沒一項。因鹽包多舛。始行割沒。因有割沒而贓罰及之。今津蘆坨鹽俱經院司親掣。遵制二百二十五舛。既無多鹽。而欲一概懸加割沒。取無名之徵。而開夾帶之門。法有未當。似難定額取益者也。部覆準查。十三年加給引目徵課覆奉。

俞旨遵行。今該御史既稱加課而不加引。商民兩便。應如所議。又稱寧餉滴珠銀兩。若行倒追。商人逃亡不一。萬不能完。查與蠲免民欠地畝錢糧。并蠲免竈丁帶徵稅課之例相符。應將十一年以前免其倒追。其十二年以後。此項銀兩已

經徵收解部。無庸另議。又割沒贓罰銀兩。查凡繫行鹽。於定額之外多帶者。秤出照數割沒入官。此舊例也。原未有懸坐定額之行。相應仍照舊例。秤掣多出數目。割沒入官。順治十八年。鹽臣張冲翼題。長蘆引課舊額一十九萬餘兩。自十二年加增十萬餘兩。而蘆商口苦賠累。有力者猶勉強支持。無力者遂相繼逃亡。逃亡之鹽引。又復加於見在諸商。各商賠累難支。雖歷年引課節據。運司報完。而十五十六十七三年之內。欠在各商者尙多。不能一時並徵。臣查長蘆十五年戶部題定。帶徵鹽引舊例。請將長蘆各商。

十五十六十七三年內逋欠課銀自十八年爲始分作四年帶徵是於額課未嘗分毫有虧不過少一寬緩而垂亡諸商均沾

皇仁於無量矣戶部議目今兵餉緊急若三年拖欠引課緩至四年帶徵則兵餉何賴遵照新例定限二年內帶徵全完可也奉

旨依議

順治十八年鹽臣張冲翼題查得商人與竈戶相依竈不窮而商始無累比年竈戶窮乏有受商鹽價而貧不能償者

有領商資本而逃不敢歸者累商損課之根。由於十二年間御史王秉乾加增浮課。又行倒追。延至今日。而各竈僅存皮骨。賠累難支。查十五六七等年。尙多拖欠。徒多敲扑。萬不能完。念竈戶熬土煎鹽。與小民種地納糧無殊。民欠屢邀

恩赦。竈戶何敢妄求蠲豁。惟望催徵少緩。以延旦夕。查兩淮節年拖欠。已蒙

恩允。數年帶完。長蘆事同一例。自應並沐

皇仁。乞將各竈節年所欠。自元年爲始。於本年額徵雜課每銀一

千兩帶完三百兩。此於

國課無虧。不過稍一寬緩。而竈戶之積困漸甦。卽產課之根原無壞。是所緩者小。而所全者實大也。戶部議將節年逋欠於每年額徵雜課每銀一千兩帶徵四百兩。按數解部。以濟兵餉。奉

旨依議

康熙元年。鹽臣高而明題。長蘆引商。自十二年增課之後。無力者相繼逃亡。所遺懸引。遂加派於見在數商。比年以來。蘆屬州縣荒殘。人民消耗。鹽無疏銷之地。引多壅積之虞。

近查兩淮鹽壅引溢業經奉

旨疏鹽二包銷引三道是併引行鹽所以甦商全課雖非鹽法常制實爲補救良模乞將長蘆歷年積引照兩淮歸併之例三引兩鹽通行帶銷將一引銑段存司繳部以防影射之弊定限二年內壅鹽盡疏積引俱銷仍遵舊制行一引一鹽之法是於

朝廷惟正之額數未嘗有虧各商卽深沐更生之路矣戶部議覆奉

旨依議

康熙二年。鹽臣張吉午題。長蘆所屬食鹽地方。直隸河南共計一十一府。除薊永正河采育等處。改引包課不計外。其部頒引口。雖有綱開之名。在初定引價。原無輕重之分。至順治十二年。御史王秉乾分別綱開之後。開封引課。每引較之綱引。增銀六分六釐六毫六絲七忽三微。由是各商咸畏開引課重。趨納綱引。且開引止限行於開封一府。不能通行別郡。以致引壅難銷。課銀積欠。今運司議將開引新增之課。均派於綱引之中。無分綱開。每引納課銀三錢九分六釐四毫一絲九忽二微八纖五塵六渺。總在綱開

七十一萬九千五百五十引之內。不失應徵歲額課銀二十八萬五千二百四十三兩四錢九分六釐八毫四絲九忽八微之數。開引既無偏重之苦。綱引得以通融疏銷。上不虧課。下不病商。誠屬妥便。戶部議覆奉

旨依議。

康熙六年鹽臣孫錫齡題。口北道屬深井東西城三處原繫煎鍋地方。奉

旨革鍋。改食蘆鹽。定額一千二百引。自應責商照數納領辦運。至於保定衛。向銷長蘆綱引三百道。今既鍋禁稅豁。除原行

三百道改銷外。當另立宣引四處計增宣引一千五百道。其引價似應與包課改引之薊永正河一例。每引例納課銀三錢一分三釐六毫四絲五忽三微八纖。統計該納課銀四百七十兩四錢六分八釐七絲。事屬創始。相應題明戶部議覆。奉

旨依議。

康熙九年。鹽臣吳賽余繕題。臣查得引目不能銷完。皆由直隸所屬順永保河等處。姦棍滿洲莊頭放馬人役。並投入旗下者。結夥百餘。騎馬帶車。各持器械。將嚴鎮等場之鹽

販出強賣。又與滿洲莊頭土豪奸棍結聯。將私鹽窩囤。伊家竊賣。州縣捕役畏其威勢。不敢捉獲。故官鹽壅滯。以致各官被參。商人借債上課。私鹽之法。雖前已嚴禁。而藏鹽窩主。及左右鄰舍該管之人。不治其罪。以致私販盛行。今滿洲莊頭。并放馬人役等。販賣私鹽。并窩囤者。其主子。佐領。分得撥什庫。小撥什庫。屯撥什庫。并本犯鄰佑。治以何罪。其兵民與販窩囤者。該管官及總甲鄰佑人等。定以何罪。傳示旗下。并包衣牛策。直隸巡撫總兵官。協同臣等。嚴行禁止。庶私販之路杜絕。官鹽之路不壅。州縣引鹽。年年

可以銷完矣。部議私鹽事犯繫旗下人。本犯主子繫官。罰兩個土黑勒威勒。不繫官。鞭七十。屯撥什庫及窩囤之兩鄰。以不行查首。鞭八十。繫民人窩囤者。總甲兩鄰各責三十板。佐領分得撥什庫。包衣大。各罰一個土黑勒威勒。小撥什庫。催莊撥什庫。各鞭五十。放馬人等。與販私鹽者。照定例治罪外。不行嚴禁。總管去的旗下章京。每扎藍去的章京等。俱罰兩個土黑勒威勒。撥什庫。各鞭八十。八旗各省駐防官員。各罰一個土黑勒威勒。管鹽運司。分司。州縣等官。責令巡役。不時嚴查緝拿。該巡撫御史。仍每年出示。

嚴禁俟

命下之日。刊刻清漢告示。通行八旗各佐領。并包衣佐領。各省王公將軍。及巡鹽御史。巡撫提督總兵等官。一體遵奉可也。

奉

旨依議。

康熙十六年。鹽臣呂朝潤題。查得京城原額。應行八萬五千五百引。又有無地帶銷之懸引。三千三百引。其從前引課銀兩。雖嚴督徵解全完。而張灣舊鹽。連年堆積。壅滯不銷。年額新鹽。復又接踵告運。則有限商資。本既停壓。課將何

辦查康熙元年間前御史高而明題準三引兩鹽之法始
獲積鹽銷盡是併引行鹽。甦商全課之成效已見於前。今
京城歲行額引見在張灣壅積多鹽。應循舊例。納三引之
課。行兩引之鹽。將一引統毀繳部。一切引課錢糧俱照三
引輸納。俟積鹽銷盡之日仍依一引一鹽運行。戶部議覆
奉

旨依議

康熙十八年。鹽臣劉安國題。長蘆運判一官。業經部議。因印
文內無分司字樣。裁併青州分司管理。奉有

俞旨。欽遵在案。但據南所商人竈戶。咸稱南十場地方遼闊。相距北十場道里遙遠。青州分司勢難分身兼顧。各商不無守候之苦。衆竈更有失業之虞。臣查滄州分司向繫運判之印。無分司字樣。原與運司一同駐劄滄州。今自滄州城垣坍塌以來。運司歲徵四十餘萬引課錢糧。關繫綦重。至今運司見駐天津。惟存運判。獨駐滄州。是昔日之長蘆運判。實今日之滄州分司。並非虛設冗員可比。況滄州一帶。南十場地方。東連海濱。西臨漕河。鹽山慶雲等處。私販易於出沒。而商鹽裝運。例由分司查驗。以杜夾帶。臣赴滄州。稱

掣目睹南所商竈情形。必須專員料理。此滄州分司誠不可一日無官者也。請復設滄州分司。就近董理。以專責成。庶南場私販得以斂蹟。而商竈皆有攸賴矣。戶部議覆。奉旨依議。

康熙二十六年。鹽臣嚴曾築題。查京城額引。因官無考成。鄰封攙越。鹽不能行。引不能銷。致奉部查。經前鹽臣蔣鳴梧分派大興宛平兩縣。照額督銷。奉

旨遵行在案。今據長蘆運司楊霖詳。據大興宛平兩縣。以新奉完欠考成。難容鄰封攙越。申請照界銷鹽。而州營官商。狃於

舊例。尙欲以該營額引。仍在大興宛平兩縣所屬之黃村等集鎮銷賣。夫大興宛平兩縣所轄人民。自應食大興宛平兩縣官鹽。不得越境食私。倘舊州之額引。仍可行銷於大興宛平兩縣所屬地方。則京城十萬五千九百餘道之額引。從何疏銷。四萬九千四百餘兩之

國課。從何辦納。今查黃村等集鎮地方。戶口旣爲大興宛平兩縣所屬。疆界攸分。應聽兩縣官商照地行銷。以專該縣責成。戶部議覆奉

旨。行銷鹽引。原有一定地方。今復行更改。小民有無偏累。著再確

議具奏。

康熙二十七年。鹽臣布爾海題查陳州等州縣改食蘆鹽。原出便民之意。但陳屬原納淮課。每引一兩四分零。長蘆所納額課。每引四錢六分零。若計課售鹽。則鹽價仍貴。民生仍累。莫若按照蘆課扣算額引。二萬四百一十九道。頒引行鹽。則上固無誤於課。下實有益於民。戶部議覆奉

旨依議。

康熙四十年。鹽臣劉灝題照得大興宛平兩縣額引十萬五千九百餘道。舊例一引一鹽。至康熙十六年間。積鹽至二

十餘萬不能疏銷。於是鹽臣呂朝潤題請納三引之課，行兩引之鹽。俟銷完之日，照舊運行奉。

旨允行在案。後於康熙二十九年間，又因外府州縣豐歉不齊，以致引積鹽壅。鹽臣江繁題請比照兩淮河東之例，隨時代銷於大興宛平兩縣鄉會之年。人口驟添，將外州縣衆商積鹽告運疏銷，以甦商困奉。

旨令直隸撫臣于成龍查明議覆遵行在案。二十三年，照例舉行代銷一次。今三十九年準行一次，臣竊念大興宛平兩縣若果鹽不敷用，何不復三引三鹽之舊。若果額不能增，何

以銷外府州縣之鹽。屢經查詢。僉云外處現積之鹽。卽與大興宛平商人所辦。因外處疏銷不去。故於鄉會之年。許其詳明代銷。並非弊竇。若一旦於常額之外。每歲增引十三萬道。舊鹽方積。新鹽又壅。在商則資本久懸。定致誦課。在官則考成所繫。或且派民商民交病。勢所必然。倘行之不久。轉起爭端。徒滋紛擾。至通州並非代銷之處。尤屬難行。理合據實陳奏。戶部議覆奉

旨依議。

康熙五十年。鹽臣常保題。長蘆引課銀兩。自四十八年間。因

河水勢大。輓運維艱。以致四十九年分一年之內不能運
兩年之鹽。自難辦兩年之課。經前鹽臣兩次題明在案。所
有五十年引課。臣屢檄嚴催。今據運司王清碩詳稱。所有
未解銀兩。業已盡數交部。眾商力實難支。雖日事嚴比。勢
不能一年完兩年之課。仍復懇題請

旨。俯準仍照四十三年帶徵之例。且稱恭逢五十年

大慶盛典。各省錢糧。盡沐蠲免。商等皆屬赤子。不得不據實哀懇。
一視同仁。將五十年分額課三十萬兩。分作五年帶徵等
情前來。臣目擊情形。不敢壅於

上聞理合具題戶部議覆奉

旨依議

康熙五十一年鹽臣穆哈連題臣查裕課莫先銷引而銷引首貴緝私每歲糧船回空夾帶私鹽販賣沿河州縣衆夥成羣互相黨護致使引壅鹽積商等困累已極仰懇

聖恩

敕下漕運督臣每歲當糧船回空之時遴選能員協同德州衛弁在桑園地方專司盤詰私鹽兼催回空船隻漕船不因賣鹽停阻并飭該員不得藉端生事於鹽漕二務均有裨益

矣。部議行令漕運總督嗣後每年糧船回空至德州桑園地方。選委能員協同德州衛弁公同搜查催趲回空糧船。并令長蘆巡鹽御史河道總督山東巡撫登州總兵官嚴飭地方文武官弁嚴行查拏窩囤務使私鹽盡絕。至沿河地方文武官弁亦嚴飭搜查催趲回空糧船。不許逗留。如有夾帶私鹽事發將專委漕員德州衛弁押運官員并該地方文武各官該督撫總鎮御史卽行指名題參交與該部照新定例嚴加議處。如有該員以搜查藉端生事該督撫總鎮御史指名題參可也。奉

康熙五十三年。鹽臣希祿題。臣查京鹽一項。大興宛平兩縣。每年銷鹽十萬五千九百三十四包。向繫承辦商人各自領引運京。稽查登號之後。照依時價。自行發賣。商民兩便。後於在京議立長蘆館。按股挨賣。名曰輪勾。延今日久。其中不無強梁多賣。良懦少銷之弊。苦樂不均。京課拖欠。疊以致京商焦澤生等。公籲禁止長蘆館名色。照舊各賣各鹽。各完各課。若不題請除革。恐日久舊弊復起。合無仍循舊例。將長蘆館輪勾陋規。永行禁止。商本得以流通。

國課可以漸裕矣。部議應行令該御史會同直隸巡撫詳晰利弊。定議具題。到日再議奉

旨依議。

康熙五十四年。鹽臣楊保題。臣查京城引鹽。每年原額新增。共計十四萬有奇。從前創設京館。置立勾簿。衆商之鹽。挨次輪勾。多寡皆得消賣。法誠善也。乃日久法弛。偏枯不均。漸至引壅課逋。衆累難堪。是以前鹽臣希祿。據京商焦澤生等公呈。題請革除京館。今遵部文。檄行運司。詳晰利弊。定議去後。據長蘆運司宋師曾詳稱。裕課疏鹽。惟輪勾銷

賣之法均平畫一。自今革去京館。令衆商卽在張灣賣。且令閩綱公保老成之商。在廣渠門張灣二處催課登帳。又遴委委員發鹽收課。設立循單。給商赴委員處驗換環照。運鹽止許從廣渠一門進城。不許繞道滋弊。其循單環照俱月終彙繳。鹽數五日一報司。鹽價半月一解庫。等情前來。臣以其間在委用得人。逐處防範。隨時稽查俾商鹽仍按輪勾銷賣。將來弊絕風清。臣謹會同直隸巡撫臣趙宏燮合詞具題。部議應如該御史等所題奉

旨依議

康熙五十八年。鹽臣殷達禮題。臣蒙

皇恩。巡視長蘆鹽課。朝夕警惕。務期新舊課餉無悞。茲據長蘆運司宋師曾詳稱。自五十四年起。至五十七年止。共計商欠二十九萬五千五百四十三兩七錢六分五釐零。內除河南直隸各府并京引商人可以完納者。計九萬五千七百九十一兩四錢二分。見在徵解不開外。獨京城舊引商人歷年共欠課銀一十九萬九千七百五十二兩三錢四分五釐零。追比無完。經臣駁催。據稱京城舊引納三引課銀。止行二引鹽。更兼新舊并徵。不能并完。查臣衙門向有

應得餘銀。除捐解銅劬等用外。尙有二萬餘兩。請自臣任
爲始。至六十八年五月止。每年捐銀二萬兩。共捐完京引
乏商歷年積欠銀一十九萬九千七百五十二兩三錢四
分五釐零。如此外有餘銀。另摺奏。

聞。再自臣以至接任鹽臣。倘有指名勒派者。查出從重治罪。至乏
商積欠。旣代爲補完。其引窩另交殷實商人運辦。務使年
完年額。嚴禁逋欠。部議應如所題。奉

旨依議。

康熙五十九年。鹽臣殷達禮題。臣查長蘆各商。自五十四年

起至五十七年止。外引所欠課銀九萬五千七百九十一兩四錢零。臣屢次檄令運司催解。據該運司宋師曾詳稱五十八九年課銀各商現在輸納。又將前項舊欠并於一年全徵。商力勢難兼辦。請自康熙六十年起。至六十九年止。分作十年帶徵。則商力舒而逋欠得完。等情詳報。理合具題。部議應如所請。奉

旨依議。

康熙六十年。鹽臣莫爾洪題。長蘆今歲自春及夏。雨澤愆期。河乾水淺。鹽船阻運。運司差官王鈞。差役陳善等。確查實

有停泊以致悞運悞課。臣雖日事嚴催。春夏錢糧難以完納。致衆商有亟求緩徵之請。經臣兩飭運司查議。茲據運司分司詳覆。請將應徵課銀暫緩停徵。少紓商力。臣見商情激切。不敢壅於

上聞。部議應如所題奉

旨依議。

雍正元年八月十一日。巡鹽御史莽鵠立題。竊照商人認地行鹽。原爲銷引辦課。但年歲有豐歉。村莊有貧富。其食鹽亦有多寡不同。長蘆各州縣。實有能銷不能銷之分。如附

近產鹽之處則私鹽充斥如路通運河則糧船夾帶如有
滷鹹之地則偷煎私販此等地方竟有全不能銷者或有
一年止可銷二三季度者雖有次年補運之例而一年又豈
能兼賣二年之鹽其舊引繳部更有一定之限是以年復
一年引積課欠商人受包賠之累雖歷年蒙有緩徵帶徵
仍拖欠課項已至百餘十萬今幸逢我

皇上宏恩浩蕩準將從前積欠盡行寬作十二年帶徵欽遵在案
再查有等能銷過額之地方引鹽賣盡百姓又不能無鹽
食淡商人必告變價之白鹽運賣而該地方兵快及無賴

棍徒知是無引之鹽必勒索訛詐任意阻撓是能銷鹽之處商人反受勒索之苦所以各商日就困乏而未能裕如也。今臣欽奉

諭旨徹底清理除私鹽弊端現在查訪逐一立法嚴禁外至額引有不能銷及能銷而更有額外多銷之處臣朝夕思維悉心講求案查康熙二十九年鹽臣江藻有題請通融代銷之例後於四十一年復行停止爲今之計欲使苦樂得均莫若仍照代銷之例准商人通融代運銷賣完課則浮引之處商免包課之累代銷之地民無食淡之虞卽地方棍

徒亦不敢有阻撓勒索之事。此外如再有不敷銷賣之處。臣飭令運司逐一查明。許該商具呈自首量增引目。商人引既能銷。課自能辦。不惟年完年額。卽其積欠帶徵等項。亦可兼納無欠矣。

雍正元年八月十一日。巡鹽御史莽鵠立題。竊照糧船夾帶私鹽。流毒沿河引地。肆無顧忌。前鎮臣袁立相奉部行令委員查拏治罪。故旗丁水手尙知畏懼。後經倉場督臣阿錫鼐爲逐船截查。不無阻滯。具奏停止在案。查向年糧船爲害。非止一端。凡路截鹽船。卸鹽起剝。搶劫官鹽。隨路發

竄巡役兵快不能禁緝商民受困難以枚舉再查山東交界桑園鎮地方原設有關口漕臣專委遊擊一員盤查回空船隻近因日久法弛臣除一面嚴飭地方營汛官弁多撥巡役兵丁在沿河一帶巡緝外嗣後所有回空糧船過關之處臣請會同津鎮臣徐仁親往查放如山東河南交界地方臣移會漕臣撫鎮等臣在東運行鹽地方差委知府遊擊等官搜查若有夾帶之鹽但盡行拋入河內不必拏人治罪催促前行船自無阻留而旗丁水手愛惜本錢亦不敢私買夾帶如有兇頑不遵盤查及失察之員卽照

去年漕臣條議新例治罪處分。臣再不時差員巡查則私鹽可杜。官引得銷矣。奉

旨糧船旗丁水手。私行夾帶。爲害地方。朕素所深知。除已往不究外。爾卽速行文總督倉場。并總漕及該地方撫鎮等官嚴查。欽此。

雍正元年八月十八日。巡鹽御史莽鵠立題。臣自蒞任以來。披閱案卷。河間之屬。鹽徒持械拒捕。致有傷人者。不可勝數。時以釐姦剔弊爲念。凡遇文武官弁。及紳衿耆老。靡不虛衷諮訪。於原任雲南驛鹽道徐琦。得知有從鹽課內留

官本收鹽之例。又據嚴鎮汎把總徐汝南詳據竈戶吳挺生劉應宿等呈稱。竈戶以開曬爲生。所賴上完。

國課。下養身家者。除鹽之外。別無生理。但竈以鹽爲命源。而鹽以商爲去路。自南場商人往北場築運。後惟有對壘壘之鹽。朝夕環泣而已。是以無商運銷。則竈不販而自販。有商買築。則私不清而自清。亟籲憲恩。撥商活竈。

國課民生。均有攸賴。等情到臣。伏查長蘆產鹽之處。有南北兩場之分。天津北場灘鹽。運由水路。船行便易。滄州南場之鹽。運從陸路。未免脚價稍重。是以衆商不運南鹽。俱來

北場告運南場一歲約曬得鹽十萬餘包告引之商不過數家止可銷鹽一萬有奇其餘之鹽露堆海灘是以竈戶得任意私賣狗棍偷扒聚眾興販拒捕傷人流毒引地商民受害以致引壅課絀此理勢之必然也今欲杜絕私販拔本清源無如援請官本收鹽之例收買灘鹽庶幾私販絕而商竈甦矣臣仰體

皇上恤商養竈之至意敢冒昧上陳除北場有眾商買運不議外其南場請於本年額課內留官本五萬兩遴委能員專司收買場鹽不許在灘露堆盡運官坵築包堆碼苫蓋收管

陸續發商告運如有南運商人資本消乏者量爲接濟則
南商有力告運銷賣及時其買鹽官本隨課兼徵遍飭行
鹽各該州縣令其官收官解灘鹽隨曬隨收隨支隨發週
而復始不獨課本無虧且商得裕而竈困甦鹽自銷而私
販絕灘鹽旣被官收棍徒亦必歸業豈復有拒捕傷人之
事卽地方有司營汛官弁可免失察之咎均得寧謐矣臣
愚以爲此一變通實於鹽法大有裨益應否允行均聽

聖裁謹奏而奉

旨爾所奏這事爾同怡親王公阿爾松阿馬齊李維均會議具奏

雍正元年九月初二日巡鹽御史莽鶴立題竊臣蒙

皇上在通州

召見

面奏長蘆行引地方實有能銷不能銷之分請將各州縣引鹽準其通融代銷如再有不足卽量加引目更求

聖恩免增錢糧如此商無拖累民無淡食且可免地方需索之弊而新舊欠課自可按年完納矣奉

諭著同怡親王等會議隨經奏覆各州縣實能銷賣若干之處交臣與直隸撫臣確查妥議等因奉

旨所議是。依議。欽此。欽遵。臣卽於本月二十三日。到津。傳齊衆商。宣布。

皇仁。無不感恩戴德。隨據閩綱商人陳澄源王正等公呈。內稱。蒙本院念長蘆引積課欠。摺奏通融代銷。是商等近年之積引。雖多。今通融之法一行。以有餘補不足。誠救時良法也。又蒙念及引再不足。

面奏增引。不復加課。查長蘆原額引九十一萬一千五百四十六道。原課銀四十二萬六千八百五十二兩九錢六分。今我皇上御極以來。歲登大有。引自易銷。商等仰體

聖恩。公同計議。每年蘆原額外。可加引八萬道。合新舊共引一百萬一千五百四十六道。情願加課銀二萬三千二百兩。均派新舊引上。每年共納額課四十四萬零五十二兩九錢六分零。在積引之商。既可通融代坐商闕引之處。又可請引告運。不獨額課無虧。抑且積欠帶徵等項。皆可請一兼完。誠甦商裕課之良法。可垂永久於萬世等情。到臣據此。臣查會同撫臣行查州縣。原爲加引便商。但所屬地方遼濶。公文來往定需時日。卽州縣各官。非面詢該商。勢不能自定。應加若干之數。今值莢秋。正各商通融運銷之時。該

商等既公議情願自首認加引目稍增

國賦以圖報効。今臣率同運司段如蕙將此四十四萬有零之課。按一百萬一千有零之引。酌議地方遠近課賦輕重。均勻分認。繕具細摺恭呈

御覽外。今歲衆商既有積引通融可運。而新增之引應自雍正二年爲始。準令告運則商民均沐

皇上洪恩不朽矣。奉

旨一恭鵠立跟進京。會同原議王大臣等速議具奏。

雍正二年八月十七日。巡鹽御史莽鵠立奏。竊照長蘆額引

九十二萬餘道。歷來不能全銷。日積一日。年復一年。每至奏銷時。尚存未領告之引。二三十萬不等。全賴次年運銷。雖本年奏銷全完。實繫向來捏報。臣於去歲蒞任後。欽遵諭旨。徹底清理。查康熙六十一年之引。未領告者甚多。而長蘆所屬一百八十餘州縣。均應參處。據商人梁樟等額懇奏銷。展限是以臣繕摺奏請。寬至雍正二年奏報。蒙

皇上恩准。展限一年。欽此。欽遵。已於今年五月內奏銷全完在案。衆商因儘力先運。康熙六十一年積引。以致雍正元年之引。除領運過外。尚有未能盡領告者。十萬餘道。前據商人

李大亨等呈稱。雍正元年之課。已勉力全完。而元年未完之引。仍照去年之例。再寬至雍正三年。奏銷等情。經臣題請寬限。蒙部議覆。以六十一年鹽引。奏請展限案內。已經王大臣議覆。止準一次。後不爲例。相應毋庸議。仍令照例造冊奏銷。等因。例行到臣。奉此。隨行長蘆運司。遵照去後。今據該司段如蕙詳。據閩綱商人李培源張錦等呈稱。商等雍正元年額引之內。現有已領未運。已運未到者。若此時。遵奉部文。迫於奏銷。必有坐繳包賠之苦。况商等屢沐皇恩。加鹽免課。通融代銷。敢不竭力告運。實因去年先完六十一

年積引以致尙有未領運者現在儘力告運。叩懇轉詳院
憲奏請再邀

皇仁展限奏銷庶引鹽得以疏銷新舊錢糧均能辦納等情詳請
前來臣查康熙六十一年之引原繫遞年所積至臣到任
以來衆商先儘運完積引二十萬道又急公併力領運雍
正元年額引八十萬有零止剩十餘萬道該商等得蒙

皇上格外洪仁疊加恩沛商困少甦而元年之課竭力措辦已經
全完惟元年之引雖有未完然較之去歲已爲多運十萬
餘道矣臣奉

命再留任二年。愈加謹慎。無刻不以恤商裕課爲念。以仰報

聖恩於萬一。今奏銷元年之引。大部催令照例造報。不準展限。所議甚是。况引目奏銷若干。若年年展限。不獨有碍定例。抑且日久弊生。敢不遵奉。但長蘆鹽引之積。由來已久。細查今歲各州縣所銷之引。實勝往年之數。今臣若違爲題參。該州縣畏懼考成。勢必勒令坐繳其引。而辦課商人。仍有包賠之累。况課從鹽出。鹽賴引護。無引無鹽。則課從何辦。臣爲錢糧起見。不得不冒昧奏請。以長蘆鹽引之奏報。再賞展限二年。將現在未完之引。每一年挨次帶運一半。於

雍正三四兩年之內積引可以全完從此以後年銷年額再無壅滯之虞不惟商免坐繳包賠之苦卽新徵舊欠均能辦納矣奉

諭旨據莽鵠立所奏未完額引雖未能全銷已銷大半所辦之事尙屬謹慎任事準其所請展限若此限內再不能完將莽鵠立一並治罪該部知道欽此

雍正三年七月初八日大理寺卿仍管理長蘆等處鹽政莽鵠立疏爲奏

聞水勢要害之處宜修隄防以護城垣以保生靈事竊查天津地

勢卑下。爲衆水滙歸之所。北由神京。西通諸澗。南接運河。皆會流於津而入海。但海口之消納。與他處稍異。每年白露以前。或遇河水漲發。渾流急奔之時。海潮壅遏。不受河流。以致狂波怒濤。危如累卵。大約天津受衝之區。要地有三焉。一曰城西南之教場。一曰城北之老君堂。一曰城東北之小關口。三者之中。目下惟老君堂爲最。蓋教場當南河之衝。水繞北流。河道紆折。又賴大隄防護。可保無虞。其小關口。當北河之衝。北場坵鹽。盡堆於此。倘有衝決。商本盡傾。

國課無辦。關繫匪輕。然爲南北二河出海之門戶。業有版堤實土以捍之。再加修築。可制洪波。至若老君堂舊基一處。前有南河。後有北河。南旣臨岸。而北河汎濫。漫過支渠。直薄其下。又無隄岸防護。連年前後。冲塌數十餘丈。僅存一線土堰。現今水勢陡發。南北兩河之水。相隔此堰。不過丈餘。左右居民。腹背受惠。幾至不保。况北河水高勢猛。此地一決。則兩河之水。合而爲一。直衝城北之單街。夫單街逼近津城。市廛商民。不啻數萬。其城壕旣窄且淺。不能容水。而城牆多傾且薄。不足禦水。霖雨連綿。大爲可憂。所以老

君堂一岸爲要害之尤者也。茲據天津士民華天祚等公呈。臣卽會同鎮臣道臣親往土埂。勘查形勢。見此一處事尤緊要。臣等一面各捐數金。暫令華天祚等募夫培築。一面祈禱。開口龍神力爲保障。幸賴

皇上洪福齊

天雲收雨霽。河水汎濫之勢漸覺停止。目前可謂無慮。但未雨綢繆。爲將來萬全之策。宜先從老君堂一帶築隄保護。并將河北之支渠。用土填塞。次將小關口。并教場兩處隄岸。加謹堅修。凡居此土者。官吏商民。或捐資或助力。莫不各出

情願除據呈批飭天津道臣柯喬年詳查妥議到日捐修
外臣爲地方水勢民命攸關謹繪河圖進呈

御覽伏祈

皇上睿鑒施行

雍正三年七月初八日大理寺卿仍管理長蘆等處鹽政莽
鵠立題爲請正疆域以便吏治事竊臣查天津一衛始於
前明散軍屯田分布各州各縣自天津直至山東德州衛
交界四百餘里津衛屯田皆與民莊錯雜因設守備治之
我

朝定鼎以來雖有衛備之官而無屯田之軍納糧當差與民一體現在改衛爲州實爲畫一但天津所管屯莊俱在各州各縣遠有三四百餘里不等津城附近反無統屬西門南門以外卽爲靜海縣地方北門東門以外僅隔一河又繫武清縣地方靜海猶是河間一府所屬津道易於佈置武清則繫順天府屬兼轄於通永道具而天津道駐劄於此一有緩急雖咫尺之民呼應不靈且州牧一官徵解錢糧審理詞訟緝捕盜修理城池倉庫以及傳發公文應差夫役種種不一皆有考成乃所屬屯民遠之在於三四

百里近之止於一城之地。欲其趨事辦公緩急有備也難矣。仰請

皇上敕下直隸督臣詳加妥議。將天津州改爲直隸州。分武清靜海青縣三邑屬之。至於天津舊轄之寫遠屯民卽就近分隸於各該州縣。其附近天津百里內村莊居民向爲武清靜海所屬者。查明丁戶地畝錢糧。相度地勢。俱歸天津州管轄。如此則經界整齊。設施便利。旣無鞭長不及之虞。亦無鄰封掣肘之患。庶幾官民兩便。於治道不無裨於萬一矣。奉

旨好。

雍正十年閏五月長蘆巡鹽御史鄂禮疏稱滄州分司所轄利民阜民利國富民海盈阜財等六場灘坵盡廢徒不曬鹽而各場竈戶皆散處於原籍直隸各州縣并山東樂陵海豐陽信等縣每逢催徵竈課錢糧場官親身赴各竈戶居住地方催徵一場官而遍歷數州縣且有隔省地方親身不能週至勢必責之於竈頭總催而竈頭包攬竈課肆行加派任意延挨在竈戶既受加派之累錢糧終至拖欠場官每受參罰切思竈戶課銀令場官催徵者原因竈戶

在各場曬鹽賣得鹽價即可完納課銀故令場官就近徵收今利民等六場竈戶既不在場曬鹽棄灘改業各歸原籍其竈課錢糧仍責之場官徵收實鞭長莫及呼應不靈且竈戶散處各州縣地方在場官既不能遙制而州縣官員又以籍隸竈戶自有專責之員不加約束以致藏奸納垢任意爲非亦情勢所必然據臣愚見莫若將六場竈戶歸併各州縣管轄其一應竈課銀兩令該分司大使等逐一詳查造具清冊移送該州縣照例徵收仍解交長蘆運司查收歸入該年奏銷冊內題報查核如有催徵不力將

該州縣官按拖欠分數照例參處如此庶錢糧款項既不
紊亂竈課亦易於徵比而各竈戶歸於州縣保甲一體管
約又不致藏奸納垢任意爲匪如蒙

俞允其六場大使均屬虛設相應裁汰以省冗員但此六場大使
皆繫揀選具題補放委署亦有解餉赴部曾經引

見之員在場均各勤慎供職熟悉場務內除海盈場大使告病遺
缺未補外其餘大使五員仍祈留在鹽政衙門効力行走
以備委差俟有別場大使缺出挨次具題補用庶得駕輕
就熟之員於場務竈課均有裨益再青州分司所轄濟民

蘆臺越支石碑歸化等五場。遠隔天津數百里。該分司不能親往隨時查驗。有天津府鹽捕通判一員。駐劄天津。鹽務既有分司專轄。捕盜又有同知可以兼管。通判實繁。閒員請將通判移駐五場。適中之越支場。專司鹽務。凡商人告運行鹽。令其按包秤掣。查驗放行。照數造冊。詳報臣衙門查核。并令巡查鹽比。約束場員。竈戶。庶稽查有人。商竈場員不能通同作弊。經部議覆。奉

旨依議。欽此。

雍正十二年十一月。巡鹽御史三保等疏稱。薊州等八州縣

鹽引奉部行令應否再行加增查明酌議具題等因。今據署長蘆運司事天津府知府李梅賓詳稱除寶坻三河二縣原額增加之引已足銷賣毋庸再行加增外查薊州尙可再加引一千五百道遵化州再加引二千道平谷縣再加引五百道玉田縣再加引三千道香河縣再加引五百道豐潤縣再加引二千道以上六州縣共加引九千五百道照薊引每引徵課銀四錢二分三釐零每年共該徵銀四千二十四兩六錢三分一釐零再灤州遷安樂亭等三州縣引地今據該商王至德情願於灤州再加引一千七

百九十二道遷安縣再加引二千三百三十三道樂亭縣
再加引八百七十五道以上三州縣共加引五千道照餘
引每引徵銀四錢六分六釐零每年共該徵銀二千三百
三十二兩一錢以上薊州等六州縣并灤州等三州縣新
加之引應於雍正乙卯年爲始頒發責令運鹽銷賣完課
再查灤州遷安樂亭等三處引名原繫王子德今應請更
換王至德引名一并責令辦納課項等情臣覆查無異理
合具題經部議覆奉

旨依議欽此

雍正十三年長蘆巡鹽御史三保疏稱兩淮鹽政高斌請除
鄰省借官行私之弊一款奉部議覆以銷引官店開設城
鄉原屬因地制宜行令詳加酌定具題等因茲據長蘆運
司查明所屬之商水項城鄆城舞陽等四縣與行銷淮鹽
之汝陽上蔡西平等縣連界山東運司查明所屬之嶧縣
莒州商邱永城鹿邑宿州等六州縣與行銷淮鹽之亳州
太和等州縣連界所開鹽店挨查確勘實繁人烟稠密食
鹽繁多按戶計引適供民食無庸移置等情各詳請核題
前來查各州縣額設引鹽原爲民間日用之需是以城市

鄉村俱令開店行銷實繁因地制宜務使商民兩便若一旦令移設於城市之內不惟民有買食艱難之苦更恐鹽徒乘機與販奸民貪賤食私必致引鹽課紳商民均受其累似應將蘆東與兩淮連界各州縣舊有鹽店仍令照舊開設檄令蘆東二運司嚴飭該地方各官實力查拏杜絕私販各銷各引各辦各課務使不礙鄰封不誤民食則於長蘆兩淮鹽課均有裨益等因前來查先經管理兩淮鹽政布政使高斌疏稱銷引官店自應開設城廂市鎮人烟稠集地方以便本境人民買食今浙閩川粵及長蘆之商

乃於淮鹽接界地僻人稀之處廣開鹽店或五六座至數十餘座不等多積鹽觔暗結梟徒勾通與販苟非徹底清查奚能改除錮弊仰懇

聖恩敕部定議行令河南浙閩川粵各該督撫轉飭地方官將接壤處所開設之鹽店逐一嚴查其有應留一二店以備本地民食者酌量存留詳報該管上司核奪其餘鹽店悉令撤回於城市開張以除錮弊下部議行

長蘆鹽法志卷十六

奏疏下

乾隆元年九月直隸總督李衛疏稱長蘆引鹽遵照部頒規
馬築包每引計重三百觔嗣於雍正十二年間經前任鹽
臣鄂禮議定河南行銷之鹽沿路折耗每引連包皮加秤
十五觔直隸各屬行銷之鹽每引連包皮加耗十觔成案
俱在詎有天津鎮標中軍遊擊科升途遇商人李純一船
運交河縣引鹽一千包自揚築運過關業經鹽臣三保公
同運司分司等掣放給水程驗單載明引鹽數目該遊擊

縱令把總高智節次攔阻。忽放忽留。勒押船戶。逐包起卸。堆積河岸。甚屬違例苦累。又用民間行使之秤。隨意秤兌。指爲浮多。卽將人船扣留。迨經鹽臣三保會令分司孟周衍賚帶部法。會同秤驗。並無溢額。而該遊擊把總復以市秤混行較量。爭執輕重。以致船戶守候多日。明繫有意怙過。滋擾所有阻撓鹽法之遊擊科升。把總高智。相應據實題參。請

旨敕部嚴加議處。再查科升由旗員初投外任。且天津鎮濱海喫要。中軍繫全標首領。其一切營伍地方事宜。均未諳練。性

愛飲酒。人地原不相當。但在軍前稍著微勞。雖查鹽指留。尚無勒賄情弊。可否於議處之後。念其年力壯健。改調旗員。當差效力。伏乞

皇上欽定。經部議將遊擊科升。把總高智。照律降三級調用。奉旨依議。

乾隆三年二月。長蘆鹽政準泰疏稱。長蘆各場竈地。因年歲久遠。圖冊無存。難以遵守。於雍正三年間。經前鹽臣莽鵠立題請。委員率同州縣分司場員。文明照依民地之例。造具魚鱗圖冊。送部查核等因。經九卿議覆。準行。隨轉行遵

照緣各場地畝俱繫民竈錯集春夏秋三時青苗在地俱難查丈其委勘各官多有因公出境等事而利民等六場繼又裁併州縣管轄是以丈量實需時日屢經前任各鹽臣節次咨部展限嗣因迷失竈地糧銀有應否歸於民佃項下徵收之部議而各州縣場遂誤以竈戶將地典賣與民無力回贖現在民人耕種納糧者爲民佃竈地卽議將迷失無地竈糧攤入徵收臣於上年莅任後細查山東迷失糧銀難以攤入民佃項下徵收但民佃竈地山東繫另款徵收載入奏冊長蘆無此款項未可將迷失地糧援照

攤徵隨飭長蘆運司妥議去後。今據該司蔣林詳稱。興國等十場。滄州等十四州縣。竈場灘地。俱已丈清。造具圖冊。並將每畝應徵銀數。暨迷失竈地項畝。并錢糧數目。在於圖冊內逐一註明。至迷失地糧。東省繫攤入另款徵收之民佃竈地項下徵收。今直屬既無民佃另款名糧。難同一例攤徵。所有查出興國。富國。滄州。南皮。寧津。交河。東光。樂陵。嚴鎮。海豐等州縣場。共迷失竈地一百三十四頃七十九畝零。共徵銀一百三兩九錢七分九釐零。豐財場奉國沖沒竈地四十頃四十二畝三分四釐零。應徵銀一十一

兩一錢八釐零。實繫竈戶包賠。又東光縣嚴鎮場共多丈
出地三十一頃一十二畝八分六釐零。共應徵銀三十五
兩七錢零。除將嚴鎮場丈出之地糧抵補該場迷失并闕
迷地畝糧銀五兩七錢五分六釐零外。實應徵銀二十九
兩九錢四分四釐零。於先經丈出時。卽議以丙辰年起科。
應俟部覆到日。飭令將乾隆元二兩年銀兩照數徵解。至
各州縣場迷失地糧銀一百三兩九錢七分九釐零。內將
嚴鎮場多丈出地糧抵補銀五兩七錢五分六釐零外。實
在迷失無著竈地糧銀共九十八兩二錢二分三釐零。并

奉圈沖沒無著地糧銀十一兩一錢八釐零。請自乾隆三年爲始。均予豁免。俾竈戶得免包賠。咸霑樂利。再蘆屬竈地。逐一清丈。並無竄入民糧之處。其應納竈糧。仍繫照舊輸納。並無重複。無庸另議陞減等情。取具各該州縣場魚鱗圖冊。分司冊結。加具總冊印結。詳題前來。臣覆核無異。除冊結送部查核外。謹會同直隸督臣李衛。合詞具題。部駁另議具題。

乾隆三年十二月。長蘆鹽政官達疏稱。長蘆於清丈竈地案內。查出與國富國滄州南皮寧津交河東光樂陵嚴鎮海

豐等州縣場共有實在迷失無著竈地糧銀九十八兩二錢二分三釐零。又豐財場奉圈沖沒無著地糧銀一十一兩一錢八釐零。因蘆屬並無民佃款項。其迷失地糧難同東省一例議攤。經前鹽臣準泰題請。自乾隆三年爲始。均予豁免。嗣奉部覆。令將迷失竈地糧銀照例設法彌補。并奉圈沖沒地糧。從前因何不卽請豁之處。查明妥議具題等因。今據運使蔣林詳稱。迷失竈地錢糧。在蘆屬旣無民佃名目。則課賦原與東省不同。自有不能畫一之勢。況又無別款可以攤徵。而現在竈地竈丁。各有應納之地丁額。

課至於奉圈沖沒地糧亦繁歷久無著均難設法彌補若將迷失糧銀加攤於現在之各竈地內窮竈未免貽累伏思我

皇上軫念民瘼凡有額賦稍重之處卽予減免豁除何啻盈億累萬今蘆屬興國等州縣場實在迷失無著竈地糧銀九十八兩二錢二分三釐零豐財場奉圈沖沒無著地糧銀一十一兩一錢八釐零應請仍照前議均予豁免俾衆竈得免包賠之累更戴

皇恩於無涯矣至前項無著糧銀可否仍於乾隆三年爲始豁免

內聲明毋庸先行逐件具題。庶需鹽之地得以及時運銷。接濟民食。而積引之商亦不致包賠課項。於鹽務大有裨益。再查乾隆三年分鹽引已於本年五月奏銷。照依往例造冊送部。茲乾隆四年二月起至七月止。各商代銷過引數。現據運使蔣林造冊詳送轉分部科查核。又目今已屆仲秋。正各商告運菜鹽之候。所有額引易銷之處。自難久待。致有遲悞。除一面仍循往例辦理外。合併聲明。下部議定。令將代銷之引。毋庸先行具題。奉

旨依議。

力。其未被災者，仍令依限完納等因。今據運使蔣林詳稱：商人承辦課賦，固賴引地豐登而築運鹽包，尤視場產難易。倘產鹽之地，一遇偏災，各商配築鹽包，較常多費，而雇覓車船，較費並倍。故從前雍正三年八年，並乾隆二年，偶遇偏災，蘆商課項，俱得遞

恩

一體緩徵。從來按照州縣被災之輕重與否，分別緩徵。今乾隆三年分，長蘆所屬州縣，雖有被災，未被災之分。然產鹽之天津、滄州等處，為各商配運之總滙。被災較重，鹽筋始經沖沒，繼難勘曬。且水路輓運動多阻滯，是以卽未被災之

之處應聽部議等情。臣覆核無異。理合會同直隸督臣孫嘉淦合詞具題。戶部議準。奉

旨依議。

乾隆四年五月。長蘆鹽政安寧疏稱。天津一帶產鹽地方。於上年秋間復遇水災。以致晚運維艱。各處銷鹽較少。商力實多竭蹶。當經調任鹽臣。準奏將乾隆三年蘆商應完冬季引課。并帶徵乾隆二年秋冬二季課銀。援照雍正三年八年之例。題請自乾隆四年爲始。每年帶完一季。分作三年完納。嗣奉部覆。令將被災之處。照例子以緩徵以紓商。

俟部覆到日造報恐致積遲應仍照原題按三季應完錢糧數目嚴催趕辦造冊奏銷以副定限等情臣查前項課帑應請一體槩予寬緩之處實與往例相符況查蘆屬乾隆三年勘不成災及未被水州縣之民地錢糧俱荷

特恩分別年限帶徵商民均屬赤子皆在懷保之內所有蘆商未完前項課帑相應仰懇

天恩俯準仍照原議槩予寬緩按年帶完奉旨著照該鹽政所請行欽此

乾隆四年八月長蘆鹽政安寧疏稱長蘆鹽引通融代銷之

州縣亦致運銷失時。脚費倍重。與已被災州縣引商同屬受困。况奏銷將屆。現今又值各商趕運引鹽之際。卽照前議。飭令辦完三季錢糧。猶覺拮据。若再加以冬季課項。商力實有不繼。難免貽誤。應請仍照乾隆二年一體寬緩之例。將乾隆三年冬課。並帶徵乾隆二年秋季課項。一視同仁。統緩至乾隆四年爲始。槩予分限三年帶徵。其元協和等分年帑項。亦請照例一併遞寬完納。則一轉移先後間。商力旣成。獲紓辦理。

國課亦仍得接續完補。至乾隆三年引課奏銷已經屆期。若

津遠近不一。其間年歲豐歉勢難預料。若必取結具題後始準通融。往返行查。恐於商課民食。均有遲悞。是以援照康熙二十九年之例。呈請戶部。每歲將通融過引數。統於奏銷案內聲明。茲奉部覆。行令仍照原題辦理等因。今據運司蔣林詳稱。蘆商行運直豫二省引地。一百八十餘處。歲銷鹽引九十六萬餘道。其間年歲遇有豐歉之不一。故銷引致有多寡。在多筴之地。代銷積引。皆因當下民食情形起見。是以隨時投遞甘結。照例詳送鹽政批准給發印票。方準領引配運。卽鹽運到時。該地方官亦必查明數目。

法繫雍正元年題定。俾值豐歉不齊之年。得將此盈彼絀之引。隨時接濟。辦納課項。立法稽查周密。無從滋弊。故十餘年以來。引不壅滯。民無淡食。乾隆三年。戶部於前鹽臣準泰題覆。原任大學士朱軾條奏鹽務八款。案內議將通融代銷之處停止。隨經前鹽臣準泰將勢難停止緣由具摺奏明。復會同前任直隸督臣李衛。河南撫臣尹會一。題請仍照舊例通融代銷。奉部覆準。應如所題。如遇積滯代銷。令取具各商情願甘結。並該地方官印結。運司加具印結。一併先行具題。嗣經臣以長蘆行鹽州縣。距產鹽之天

橫行返久已逾時在各處壅滯之引必至奏期空繳包課而此日能銷之地又必悞運有闕民食揆之事勢委難遵行應將長蘆引目通融代銷之處循照康熙二十九年前任巡撫于成龍題定之例統於奏銷時造冊送部查核等情臣查鹽之有盈絀原因年歲之豐歉而通融撥運又在隨時接濟難以緩待是行查取結具題後始準代銷之處實於民食商運均有貽悞況歷年準其通融之引俱已立法稽察甚屬周密從無弊竇相應仰懇

天恩俯將長蘆代銷鹽引準照康熙二十九年之例統於奏銷冊

相符。方準入店銷賣。仍一面行知本引地方州縣。又於每季將代銷各引造冊呈送總督查核。是長蘆引目各處均有稽查。立法已屬周密。商人實無從朦混滋弊。且年歲豐歉四時既無從預知。則銷引之多寡。先期又焉能預定。故各處或偶艱於疏銷。或偶易於銷售。皆繫隨時變通。斷難預爲額定數目。先行詳題。若令逐件。或逐月具題。則章奏紛繁。亦覺瑣屑非體。況蘆商告運鹽筋。夏秋水發。既陸路阻礙。冬間河凍。又水運停滯。在民食正需接濟。不容稍緩。今必俟地方官查明出結題請議準之後。方許配運。將文

乾隆六年八月長蘆鹽政三保疏稱長蘆引鹽每包加增五十觔一案前奉戶部議令核明加課具題并令將乾隆二年起應徵課銀一并查明著追等因今據運使倪象愷會同署布政使劉於義詳稱長蘆每年額引九十六萬六千四十六道每引加鹽五十觔通共加鹽四千八百三十萬二千三百觔每引二百五十觔合算應計引一十九萬三千二百九道二分長蘆引課科則不同懷引每道納課四錢六分八釐零蘄永引每道納課四錢二分三釐六毫零今遵戶部定議折中合算以懷引之四錢六分八釐零並

前永引之四錢二分三釐零。合併折中。每引應徵銀四錢四分五釐八毫零。共應加增課銀八萬六千一百四十二兩九錢八分六釐四毫零。所增銀兩。卽均攤於額引九十六萬六千四十六道之上。每引一道。應加增銀八分九釐一毫零。毋庸另增引張。此項增課。自應本年入額徵收。但查各該商。除應解本年正課四十四萬餘兩之外。尙有應辦三年分冬季緩徵銀一十一萬一千八百二兩有零。又帶徵銀一萬四千餘兩。是本年所辦。總共該銀五十七萬餘兩。如再加徵銀八萬六千一百餘兩。竊恐商力有限。輸

納不前。致多逋欠。至壬戌年。各商緩徵之課已完。每年止辦正課銀四十四萬餘兩。非帶徵舊欠銀一萬四千餘兩。則商力少紓。應將此加徵八萬六千餘兩之項。自壬戌年爲始。入額徵收。其乾隆二年起至乾隆六年止。按照現在加增之課。五年並算。共應追徵銀四十三萬七百一十四兩九錢三分二釐二毫零。爲數既多。更難一時催辦。並請於壬戌年爲始。分限十二年帶徵。如此庶各商得以從容辦納。而舊額新徵。均得輸將。不致逋欠等情。臣查蘆引所加鹽餉。悉遵部示。按照原額引課折中核算。每年應加增

課銀八萬六千一百四十二兩九錢八分六釐四毫零所
增銀兩卽均攤於額引之內完納毋庸另增引張。惟是加
增課銀自應卽於本年入額徵收。但查各商現有應完帶
徵銀兩恐商力有限輸納不前應請俟帶完緩徵課銀之
後於壬戌年起將加增銀兩入額徵收其乾隆二年起至
乾隆六年止此五年應追之課照加增之數核算共有四
十三萬七百一十四兩九錢三分二釐二毫零爲數甚多
實難一時催追相應仰懇

天恩俯準並於壬戌年起分限十二年帶徵俾商力紓徐辦理不

致並賚理合會同調任直隸督臣孫嘉淦合詞具題部議
準分限八年帶徵奉

旨依議。

乾隆九年七月長蘆鹽政伊拉齊奏據長蘆運使鄧釗詳據
商人王至德等呈稱竊以救災捍患固

聖世之常經發帑截漕實

熙朝之曠典况以麥秋失望四月五月之賑恤固已優渥有加尤
慮民困未舒修城導水之曲籌實仰

勤求不倦。

當宁之已飢已渴。凡皆淪浹。夫羣生。愚情之獻曝獻芹。或亦可邀
於

聖鑒商等幸生堯天舜日之世。深感茹毛踐土之恩。不有寸私。莫
伸下悃。敬願捐輸銀十萬兩。於秋成陸續交庫。聽候撥濟
公用等情。據此竊查該商等仰沐

聖恩高厚。遂成起報效之誠。連名呈請願捐。羣趨爭先。恐後相應。
據情詳請察核轉奏。至該商等踴躍爭先。急公報效。可否
邀請議敘以示獎勵。並造具花名銀數清冊呈送前來。臣
查上年天津河間二府偶被偏災。荷蒙

皇仁蠲賑兼施固無一夫不獲其所。今春雨澤愆期。復議廣興水利。

聖謀愛養民生。至周至備。將來需費帑金。何啻億萬。凡受覆載之恩。當竭報效之悃。蘆商素沐

高厚。感恩報效。茲據商人王至德等三十八名情願捐銀十萬兩。聽候撥濟公用。由運使詳請代奏前來。臣不敢壅於

上聞。謹據情繕摺具奏。再該商等急公報效。感戴心誠。可否準予議叙。

恩典出自

皇仁。非臣所敢擅專者也。謹奏。奉

硃批。該部議奏。經部議準。並準備造詳細履歷清冊。給予議叙。

乾隆九年十一月。長蘆鹽政伊拉齊奏稱。民間所食有引官鹽。原照州縣營衛之大小。軍民戶口之多寡。計口食鹽。按鹽定引。課從引出。鹽由引銷。引壅則課絀。課絀則商困。細察根源。實因私販充斥之所致。臣奉

命巡視長蘆鹽政。凡有關鹽務。無不悉心體察。惟期國課無虧。商民有益。實力奉行。無負

皇上委任之至意。今查直屬之灤州。遷安。樂亭。豐潤。寧河。五州縣

商人認地行鹽。疏銷官引。除舊定額引之外。又復屢次請增引目。至一萬七八千引。洵爲急公辦課。自乾隆元年。經前督臣李衛題設老幼孤貧按名給牌。許一日一次赴場負鹽四十觔。易米度日。名曰老少牌鹽。實繫仰體

皇仁。惠養窮人之善舉。不意設立貧販以來。官引日見難銷。私梟日甚一日。現在灤遷等五州縣。貧販四五十名不等。以每人每日負鹽四十觔。合計一年。約共一萬一千餘引之鹽。官引已佔過半。即使貧販毫無影射行私。而官引已有鹽壅課絀之虞。况場窰阻隔遠近不齊。徒假老少貧民之

名色實爲奸梟囤戶之護符。如孤寡殘弱無告之貧民。老者六十歲以外。少者十五歲以內。兼有疲癯廢疾。赴場籌買。近則數十里。遠則百十餘里。步履尙屬艱難。何堪背負奔走。若以道途之遠近計跋涉之行踪。必得一二日至二三日始獲負鹽一次。沿街叫賣。隨時出售。所餘利息。已不敷往返食用。設遇酷暑嚴寒。風霜雨雪之時。雖欲赴場負鹽。亦勢所難能。因而有種不法奸徒。勾串貧販。就產鹽場竈之處。覓一偏僻地面。用賤價收買窩囤。今日過東。明日轉西。並無一定下落。或藉老少名目。重複混買。或串頑猾

竈戶盜賣行私盈千累萬。早夜搬運車載肩挑公然無忌。一經拏獲輕則棄鹽逃走重則拒捕傷人。且地方遼濶有數巡役焉能宗宗究結卽如獲送到官之犯審訊時皆以買之老少脾鹽爲詞。竟爾漏網。如此弊端不可枚舉。是以上年商人王至德以奸徒囤積轉販官引難銷請將此老少貧民照閩省之例商捐折給錢文以資養贖。又以灤州遷安樂亭三處引地原繫已業今貧販竈鹽充斥每年賠累難支具呈情願退出將原業引價銀九萬二千五百餘兩之引地分文不取另著商辦臣伏念該商王至德父子

世受

國恩認引行鹽尙屬急公辦課今以私鹽充斥官引難銷恐蹈罪戾將九萬餘金之產業情願告棄實因艱辦起見卽另招他商接認承辦彼見前車旣覆畏首畏尾亦俱退縮不前臣再三籌畫課餉固不容緩而綱商亦應培恤當據該商所呈批行運使轉飭各該州縣議詳去後茲據灤州知州盧見曾等議詳停止老少牌鹽援照閩省之例加倍折給貧民錢文不惟官引藉以疏銷而貧民更霑實惠等情由運使鄧釗等核議按貧販名口實數每名每日給與

大制錢二十四文。每月需錢若干。飭商於每月下旬捐交。各該管州縣貯庫。月朔傳齊老少貧民。按名散給。緣由前來。臣細查閩省貧販。折給錢文。每名每日不過十數文。今各州縣加倍議給。增至大制錢二十四文。卽爲京錢四十八文。統計合算一身一口。風雨勿阻。每歲得錢一十七千有奇。不但老少貧民瞻養有餘。卽尋常傭工覓食者。亦足以餬口無憂。較之額設孤貧口糧。更覺裕如。庶此等無告貧民。無往來叫賣之勞。免暑寒風雨之苦。安居樂食。得終天年。旣獲。

國家恤老憐貧之實惠而牌鹽名色一經停止則囤積影射之奸徒亦無可施其伎倆此不禁而自戢也私販難以影射官引得以疏銷將見認引行鹽之商專心承辦漸次得復舊業如此一轉移間實與商民兩有裨益臣職司鹽務目擊情形現據運司議詳不得不據實陳奏伏祈

皇上睿鑒敕部議覆施行再查此外設有貧販之天津等八州縣現據運司詳稱亦據各商呈請一例折給錢文誠恐各屬異宜行令各該地方官確查妥議另詳等語咨俟詳到再議合并聲明等因前來查乾隆元年正月內欽奉

上諭著直省督撫嚴飭各府州縣文武官弁督率差捕實拏奸商大梟勿令疎縱至貧窮老少男婦挑負四十觔槩不許禁捕欽此欽遵通行去後嗣據原任直隸總督李衛奏稱長蘆鹽務凡貧難挑賣四十觔從前俱未定有成規今天津鎮道各呈報所屬一帶愚人不知

皇上高厚天恩止在寬恤貧民使遵四十觔以下不行禁捕之例得以糊口竟有船載私鹽分散各村貨賣數十人結聯而走每擔約八九十百觔不等兵役查拏卽以違

旨聞聞甚至拒捕直隸尙且如此他省可知伏祈

聖明鑒察應否密飭各省督撫加意撫綏部駁另議具奏。

乾隆十年五月長蘆鹽政伊拉齊疏稱灤州遷安樂亭豐潤寧河等五州縣引地自設立發鹽以來詎料日久弊生遂至官引難銷皆緣奸徒收買牌鹽發販充斥之所致若不亟爲調劑

國課商本均有虧絀是以上年臣將情形繕摺具奏請照閩省之例折給貧販錢文以杜囤積影射之弊嗣奉戶部劄開停止老少牌鹽照例折給錢文於商固屬有益而於民有無未便行令會同督臣秉公確查詳酌妥議等因轉飭

查議去後。今據布政使方觀承。按察使嚴瑞龍。鹽運使鄧
釗。詳稱。灤遷樂豐寧等五州縣。現存老少四五六十名不
等。以每人日負鹽四十觔合算。年約合引一萬一千餘道。
是雖無影射行私之弊。已有引壅課絀之虞。何況積慣私
梟。勾通奸宦。恃有牌鹽影射。恣意盜賣販私。此其私鹽充
斥。官引難銷。課多虧絀。商困日增。至貧窮老少。準負零賣
乃

國家惠養無告窮民之

曠典。若果窮民俱沾實惠。亦未敢輕議更張。今惠養窮民之利。

既被奸徒侵佔。又復影射行私。此其法久弊生。誠宜斟酌。權變。蓋老少去負鹽厥所。近者數十里。遠者百數十里。卽就近厥者而論。一日僅可往返。雖少壯之人。終日背負奔走。亦覺勞苦難堪。何況老幼殘廢。年力衰憊之人。因老少力難背負。故梟徒得逞其奸。遂招引老少賤價收買。而老少既憚跋涉之勞。又慮難於銷售。俱情願減價賣與奸梟。且間有奸猾老少。希冀重複混買。惟求卽時速售。更不計獲利多寡。是以老少脾鹽。悉歸私梟囤販。窮民之利。既爲奸徒所侵。囤積私販。又藉脾鹽影射。今若照閩省之例。停

止脾鹽折給錢文則影射罔積之弊既除而私梟不禁白
敢鹽法肅清引銷課裕於商有益固無論矣。而向時冒雨
衝風。背負奔走之老少。今則無論風雨疾病。計日得錢。安
居飽食。永無凍餒之虞。其樂昇平之歲。是於老少貧民。不
獨並無未便。抑且更加有益。應請將老少脾鹽題請停止。
仍飭各屬查明。現存老少若干名。每名每日給大制錢二
十四文。令商人每於月底照數捐交。該管州縣於月朔傳
齊老少。按名散給。不許遲滯稽延等情。會詳前來。臣查老
少脾鹽之設。原爲惠養窮民。今折給錢文。免其跋涉負賣。

均得安居樂食。受益更深。况脾鹽一經停止。國積影射之奸徒。實無可施其伎倆。將見私販不禁自戢。官引得以疏銷。課額充裕。於商民均有裨益。臣謹會同陞任直隸督臣高斌。合詞具題。再查設有老少之天津等八州縣內。除天津一邑。繫水陸通衢。人烟稠密。該縣額引已附靜海縣代銷。城鄉村鎮。向來俱食脾鹽。所有原設貧販。未便停止外。其餘滄州鹽山等七州縣貧販。應否一例折給錢文之處。現據運司檄行該州縣確查。應俟詳覆到日再議。合併聲明。下部議行。

乾隆十三年六月。山東巡撫阿里衮署理長蘆鹽政。麗柱奏稱。今歲恭遇

聖駕東巡。凡直東兩省官吏兵民無不共沐

恩膏。惟行鹽各商尙未仰邀

惠澤。臣等仰體我

皇上深仁廣被。覆載靡遺之至意。懇請一體

加恩。查得東運額引并接濟引共五十五萬道。額餘票共二十三

萬八千二百四十道。內引課每道徵銀二錢四分五釐零。

票價每道徵銀二錢二分三釐並二錢一分六釐不等。其

引票俱按部頒引張。一引一包。計重二百二十五觔。臣等酌議請於引額之外。每百觔增給一十觔。免其加課。統計歲額引票七十八萬八千二百四十道。共加增鹽一千七百七十三萬五千四百觔。限以二年停止。如蒙

恩準。則直屬蘆運額引事同一例。並懇

聖恩一體加觔。查得蘆運京外額引九十六萬六千四十六道。每道徵銀四錢二分三釐。至四錢六分八釐不等。每引每包計重三百觔。每百觔請加鹽一十觔。免其納課。統計一歲加鹽二千八百九十八萬一千三百八十觔。仍照依東省

定限二年停止。則蘆東各商辦運引鹽。均得寬裕。下部議行。

乾隆三十六年。長蘆鹽政西寧奏。據長蘆鹽運使趙之璧詳稱。長蘆行鹽引地。直豫兩省。共一百八十四州縣。舊州采育二營。鹽引數目。雖多寡不等。大率以地方之大小。戶口之繁簡。分別定額行銷。緣年深日久。今昔情形不同。遂致有滯銷之區。大爲商累。雍正元年以前。各商欠課百十萬餘兩之多。經前鹽政莽鵠立奏。準通融運銷。舊欠錢糧。每引加鹽五十觔。免其輸課。分年帶完。嗣後鹽仍加課。又於

乾隆十七年前鹽政吉慶以督銷州縣因引可通融別邑視同膜外請將銷引未完州縣雖鹽已代銷仍按其未完分數查參銷鹽已至八分以上通融僅止一二分者毋庸加以參處等因奉部覆準在案但滯銷州縣既顧考成則嚴催各商務將八分引目繳銷以免處分其實銷售未完年復一年既壓成本又包課項前後不免週轉以致積困日深仰蒙

皇上軫念商艱疊次增價誠千載罕遇之

恩實鹽務振興之際惟是商人認地行鹽有暢有滯在暢銷口岸

固益有起色而滯銷口岸仍不免有積壓包賠之累。若不早爲調劑。誠恐積累愈深。請將長蘆滯銷地方引目。仍照從前代銷之成例。俯準各商於續定八分引內。酌量銷售情形。再準通融一二分。除兩省行鹽各州縣內。年銷年額者。毋庸籌辦外。其滯銷之區。京外引則有四十六州縣。舊州。采育。二營。每歲若再準融銷一二分。計算引數不過四五餘萬道。而暢銷口岸。共有九十七州縣。每歲約可多銷二三十萬道。額額餘引。只五萬道。又續請餘引十萬道。又代銷京融各引八萬餘道之外。尙可加銷通融引四五萬。

道。以此地之積壓補彼處之不敷。庶額引既免壅滯。而與
餘引亦無妨礙。倘敢再有壅滯。於考核時。仍按原定額數
連融出之引。並計分數查參議處。各參商歷年虧欠課帑
等銀。共有一十四萬八千三百餘兩。雖已將各名下家產
查封估變。併將引地積鹽。飭令地方官銷賣。價銀解交運
庫。抵完舊欠。第虧闕過多。不足抵補十分之一。日事追地
迄無完納。所遺引地。已經虛懸兩載。目下代運之商。究屬
權宜辦理。現雖上緊招商承認。無如蘆商中殷實者少。未
能一時出有現費。且以一歲之內。欲其兼納舊欠。其力更

屬難支。惟祈奏明寬以年限。著落綱總選保殷實能事之商。分地認定。先將參商名下所欠有利之帑。令其換具領狀認領輸息。卽抵引窩價值。其餘舊欠課項。除參商家產鹽價變抵外。不敷銀兩。核其舊欠銀若干。計其所得利息多寡。酌定年限。自二三年以至七年不等。并令新商代爲完納。如此庶於課帑民食。均有裨益。理合開明各欠數目。并酌分年限完納清冊。詳請核奏。至參商等經理不善。以致虧闕課帑。實有應得之罪。未便因其所欠各項。將來一有新商。分限代還。卽任其脫然事外。應請仍按各名下未

完分數。照例分別治罪。以示懲警。合併聲明等情。臣覆加
細查。均繫實在情形。自應亟爲籌辦。理合據情仰懇

皇上天恩。可否俯準滯銷四十六州縣二營鹽引。每年再準融銷
一二分。計算不過四五餘萬道。而暢銷口岸。共有九十七
州縣。除領銷餘引。並融銷京引之外。尙可加銷通融引四
五萬餘道。以此地之積壓。補彼處之不足。各商引地得以
均勻。自無滯銷偏累之虞。至參商舊欠。酌分年限。令新商
代爲完納。商力得以紓徐。自必踴躍承認。有專商辦理。庶
引地不致虛懸。而舊欠帑課。亦得逐漸完清。除將各欠數

目酌分年限完納緣由另造清冊送部外。臣謹會同直隸總督楊廷璋合詞恭摺具奏。下部議行。

乾隆四十七年十二月。長蘆鹽政徵瑞奏稱。竊查長蘆奉發當架等帑本銀兩。交商營運。誠以商力不齊。遇有資本偶闕。得隨時領借。便於轉輸。

恩至渥也。乃臣到任之初。查知無著帑本。因而究悉原委。緣商力消長不常。逐年悞課參革不一而足。每一參商。卽有兩年未完課銀。加以領借帑本。應交利銀爲數旣多。引產不敷。所抵接辦之新商。估計窩價。半認前欠。往往因口岸疲累。

另借帑銀。又或不善經理。接踵參革。如此仍仍相因。商經屢易。積數遂多。竟有日久徒事比追。而帑項始終懸宕者。先經臣於熱河

召見時。將實在情形。面爲陳奏。嗣臣自山東回津。復同蘆運司張棟澈。底清釐。除參商隱匿家產。及保商徇私保借。另行究辦外。現在查得遠年參案內。各參商名下帑本銀二十九萬二千八百八十五兩零。近年參案內。各商名下帑本銀二十七萬七千七百四十八兩零。所遺引地。旣久變抵家產。亦復查封。實共虛懸帑本銀五十七萬六百六十三兩

零。其中有已經通綱認利者。有未經通綱認利者。除前鹽政西寧奏欠利銀十萬六千四百餘兩。分別攤賠外。現在上年至今。又有欠交利銀五萬七百三十二兩零。帑利大半。歷年奏解。而此一年之內。亦緊參商應交之利。復有未完利銀十萬五千五百六十餘兩。此外尚有積年墊給運本等銀七萬兩。以上合計統共銀七十九萬六千九百二十餘兩。悉屬參商實在無可著抵之項。臣既已逐一清釐。何敢仍以差追塞責。竊思此項銀兩。商欠理應商還。第僅以無著銀數。令通綱按引均攤。恐日久猶存參商借欠之

名。不過視為代交利銀。而帑本究非實在。自應亟為彌補。不得復留塵積。茲據眾商議請分作五年歸款。自乾隆四十八年為始。每年按引繳銀二錢。隨課完納。收存運庫。以扣抵各款。所有無著帑本。自後應解現年利銀。即於商繳銀內扣解。其上年及今年欠交利銀。一併於商繳銀內均分五年掃數清解。餘銀歸還墊款之外。即作帑本貯庫。以後逐年解利存本。計至五年。無著帑銀。俱歸有著等情。由司具詳前來。臣查蘆商屢沐

皇仁。感深淪浹。據議通綱繳銀。亦屬眾擎易舉。惟有仰懇

天恩俯準分限五年俾紓商力。所有前項無著銀七十九萬六千九百二十餘兩。再加以五年內應解現年利銀約三十萬兩。統計在一百萬之外。核算各商按引繳銀二錢。每年約銀二十萬兩。五年共繳銀一百萬兩。照數扣抵。並無浮多。統俟五年之後懸帑全清。商繳一項。卽行停止。再行奏

聞。惟隨課完納。每年必在十一月底始能交庫。其中有應解現年利銀一項。卽隨時墊解。統於十一月內繳銀歸款。至此項帑本。旣經通綱賠補。應準通綱公借公還。不得再借於疲乏之商。致日久復蹈故轍。再現商所借多有帑浮於引者。

亦應俟四十九年。緩徵川餉全完之後。商力稍寬。令其將浮數分年抽繳。轉發少借之商。俾引帑相均。以除前弊。並請嗣後。每至五年鹽政清查一次。據實陳奏。庶商借帑本絲毫皆知慎重。而應解利銀。亦可期年清年款。下部議行。乾隆四十八年。長蘆鹽政徵瑞奏稱。楊村備撥。前督臣方觀承所定成規。以楊村備撥。專因北運河水勢微弱。漕船體重難行。撥載宜用小船。方利遄行。若大船吃水過深。並不適用。而商雇運鹽。多用大船。遂議三百石以下之船。封撥漕糧。二百石以上之船。聽商雇運。並飭商遠赴外境。用價

雇定填發護照然後來津裝載以杜船戶影射之弊天津
爲船隻總匯之地今年到關船隻比前較少詢訪輿情其
故緣辦理封撥不論河水之充裕淺澁用多用少一例必
取足額沿河協濟不分船之適用與否悉令充數楊村派
撥守候無期又一槩截留不放自二月冰凍方解糧船未
到之前先已預爲封禁直至九十月淨壩放船之後爲日
無幾卽屆河凍船戶衣食是資累月坐廢所以一聞封撥
來者中止是其畏避之情皆由曠日持久之故而津船稀
少實皆不使流通之所致查蘆商每年運鹽百萬餘引今

以備撥之故。槩爲封禁。不復有餘剩。大船爲商鹽雇用。百萬帑課所出。兩省民食攸關。恐致貽悞。且重載貨物。赴通銷售者。中途差押起卸。槩令騰空備撥。客貨聞風裹足。竊恐關稅錢糧。勢必短闕。卽天津一帶。直至京師。民間食用必昂。並恐年甚一年。將來撥漕。亦至掣肘。似宜急爲調劑。奉

硃批。此奏似有所見。行在該部。速議具奏。

乾隆五十年八月。鹽政徵瑞奏稱。竊查南漕入北河。後撥運船隻。悉繫官爲封雇。近年糧船到遲。而封撥之船。早已預

備守候日久以致船戶畏避不前民船日見稀少天津向
爲船隻總匯之區今頻年船少致商鹽百餘萬引艱於輓
運四遠雇覓水脚倍增終形掣肘此漕鹽兩項船隻竟致
相妨之情形也臣伏見本年漕運阻滯上廩

宸衷指示催儻截留現在沿途截存之漕在在需撥若不設法調
劑將來不但商鹽關運並恐無船備撥於漕運亦大有關
碍臣留心察看欲籌兩利之舉惟有造船撥漕一法茲據
長蘆通綱商人具呈情願捐銀三十萬兩造船一千餘隻
以供南漕隨到隨撥並懇

賞借庫銀墊辦。分年完交等情。呈請具奏前來。臣查蘆商疊沐皇仁。久已淪肌浹髓。今願捐資造船。自出感激至誠。且其急公之意。亦屬自利之計。似應俯如所請辦理。前經臣面奏。荷蒙聖鑒。惟捐項一時未能湊集。仰懇

天恩。暫準動撥銀三十萬兩。令各商按引均攤。每年完交銀三萬兩。分限十年歸款。如蒙

俞允。臣卽飭運司由運庫內動撥。解交直隸督臣劉峩。派員趕緊成造。務期明年新漕應用。其雇用水手工食。逐年修船款項。及將船隻分交與沿河州縣承管。並遇有銅鉛奉麥豫

豆等項隨時裝撥其南糧未到之先漕竣之後洋船戶攬載營生以資貼補工食之處督臣現在天津與臣面商統俟

命下之日聽督臣妥定章程自行具奏抑臣更有請者自造船之後應嚴飭地方官永遠不得再行封挈民船其成造之船總令地方官經理亦不得再累及於商如此一爲籌辦則撥船寬裕既屬速漕之一法且民船得免官封聞風雲集商鹽足運於課餉亦有裨益至於貨載招徠關稅民用更均資利賴於無旣矣奉

上諭據徵瑞奏備造撥船已明降諭旨準行矣所奏請交劉莪派員成造一節此項撥船所需板片木料較多直省恐不能應手著徵瑞開明丈尺數目知照特成額吳垣舒常令該督撫等於湖廣江西二省遴派妥員各趕造五百餘隻以供撥運詳諭旨

乾隆五十二年八月鹽政穆騰額奏稱捐造豫省撥鹽船隻

鹽漕兩便仰祈

聖鑒事竊照乾隆五十年間因楊村一帶起撥漕糧用船較多商鹽雇船闕少水脚騰貴經前鹽政徵瑞奏請通緝捐造撥船一千二百隻留爲北河撥糧之用商鹽得以雇用民船

水脚頓減鹽漕兩益嗣於乾隆五十一年前鹽政徵瑞復行奏明續造撥船三百隻共一千五百隻撥運益爲敷用。此撥船之有益鹽漕已有明效也。茲據通綱商人王世榮等呈稱前項撥船正爲北河等處應用而設。而蘆商每年有裝運豫省引鹽三十餘萬包。由天津運至大名府屬之龍王廟白水潭等處。該處水淺河狹原船不能前進。必須另雇撥船轉運而豫省載運黑豆雜糧多在該處雇船往。往船不敷用。且商等秋關引鹽運至大名。正值軍戶撥糧之候鹽漕同時雇撥以致船戶居奇水脚昂貴甚至羈阻。

逾歲守凍需時。旣糜脚價。又誤課帑。商力實爲竭蹶。今商等通盤籌畫。情願捐造撥船一百五十隻。在龍王廟白水潭等處專運引鹽。一切民船均留爲撥糧之用。則撥船專爲運鹽。不惟多省脚價。輓運自可從此無阻。而商鹽不用民船。亦於軍戶撥糧甚便。至此項船隻較撥漕船丈尺稍可窄小。約計工料等項。每船需用銀二百二十兩。合計一百五十隻。共需銀三萬三千兩。查前兩次排造撥船。繫直豫衆商。公同捐辦。今直商已得備造撥船之益。此次若令豫商獨自捐造。未免偏枯。商等公同議明。將應需工料銀

兩直豫兩綱按引公捐。以昭平允。並懇先於運庫存款內
動支排造。分限二年各商按年隨引完納。以清款項。懇請
轉奏等情。由長蘆運司李世望據情詳請前來。臣覆查直
豫引鹽。全在輓運得時。暢銷獲利。今直商既因捐造撥船。
商鹽雇用民船。腳價平減。行運無阻。而豫省未設撥船。鹽
包運至大名府屬之龍王廟等處。河道淺狹。另行雇船撥
運。每值豫省運京豆麥及軍戶撥糧。同時並雇。以致船隻
闕少。腳價昂貴。商費不貲。甚至羈阻逾歲。賠悞課帑。自屬
實在情形。今直豫商人情願公捐銀兩。備造撥船一百五

十隻專運引鹽。並請於運庫存款內借銀三萬三千兩動支備造。分限二年於乾隆五十三五十四等年隨引完交。俾運費節省。商力益紓。而於漕運亦屬兩便。相應據情奏請

天恩如蒙

恩準。請卽於本年九月在運庫借給銀兩。飭令鳩集工料設廠備造。明歲可資撥運。其銀分限二年於五十三五十四等年隨引完交。以清款項。至所需船戶水手工食該商等本有應出運腳。各按鹽包多寡。均勻雇給。俟成造之後。並請編

列字號。咨明直隸督撫。飭行地方官。不得封雇。致悞鹽運。
是否可行。臣未敢擅便。伏乞

皇上睿鑒。謹奏。奉

硃批。可行。知道了。

乾隆五十七年十一月初九日。長蘆鹽政穆騰額疏稱。長蘆
山東鹽法志書。經臣奏準重修。當卽檄行長蘆山東二運
使遵照。如有今昔不符之處。查明辦理去後。茲據長蘆運
使嵇承志。山東運使阿林保詳稱。查得商人行鹽引目前
經戶部題定式樣。刊鑄銅板刷印。頒發護運行銷。惟查鹽

法事宜。歷經更改。而鹽引所載。尙繫舊日條規。如引內所載。長蘆每引二百觔。嗣於康熙十六年。雍正元年。二次題定。加增。現在每引以三百觔爲一包。又乾隆元年。經前任總督李衛題明。河南引鹽每引連包索加耗鹽十五觔。直隸引鹽每引連包索加耗鹽十觔。各在案。山東商鹽每引二百觔。亦於康熙十六年。每引加鹽二十五觔。今以二百二十五觔爲一包。又蘆東行鹽地方。引內開載。俱繫舊日府分。後有陞州爲府。並州縣亦有添改。又各場竈丁等販私七款。與現行則例多有不符。理合造具清冊。逐一註明。

詳請具題更正理合恭疏請

旨敕部核議將長蘆山東鹽筋數目並行鹽地方應增應刪以及
販私七款逐一更正請自乾隆五十九年爲始新定式樣
刊鑄刷印頒發護運俾引式不致參差商民永相遵守再
查山東有引票之分引與票均繫一板刊刷惟票內另蓋
戳記奉

旨票鹽改引之引字樣應請仍舊蓋用以示區別合并陳明除將
原冊分送部科查核外理合具題下部議覆

乾隆五十九年九月三十日長蘆鹽政徵瑞奏稱

國家設立育嬰堂收養民間遺棄嬰兒最爲善政天津人居稠密向無育嬰堂偶遇歉收之年往往有嬰孩棄置道途無人收養者臣與運司議商於鹽務中添設育嬰堂一所
以廣

聖主保赤之仁計歲需乳工食米衣服柴炭醫藥什物等費以嬰兒二三百名核計必籌長年經費查蘆商有奏明按引捐銀一錢爲彌補參商無著帑課及津貼官造撥船飯食之用請卽於此項銀內每年視收養之多寡酌撥銀自五千兩至七千兩爲止作爲經費本年收養尙少卽以此銀兼

辦堂屋仍按年具報內務府查核本繫商捐之項抵商人應辦之公商免重出而公事有濟矣。惟育嬰堂既爲鹽務中所設僅聽商人經理難於兼顧臣查有原任通判周自邠天津人老成端正好善不苟商民素所深知令其專司堂事必能妥協臣仍與運司隨時查察務使久而勿懈謹奏奉

硃批好知道了。

乾隆五十九年十一月鹽政徵瑞奏爲酌籌調劑蘆東餵務請更定行銷章程以歸畫一事切照蘆東商力素稱微薄

鹽蒙

皇上施恩沛澤衆商莫不感戴

深仁。自宜營運寬紓。日有起色。而臣自上年到任後。察看情形。轉運彌覺周章。辦課時形竭蹶。屢經詳切訪詢。據該商等僉稱。蘆東每年交納正雜錢糧帶徵緩課。以及帑本帑利等項。需銀數百萬兩。以賣鹽之錢易銀完交。賠折過多。以此商本日就短絀。力有難支等語。臣復詰其因何賠折之故。據稱商等認地行鹽。定價賣錢。必須向市肆易換銀兩。一州一邑。銀鋪無多。近年遂有市僧將銀囤積。居奇明知商

等應完帑課之時。故昂其值以跌錢價。若不與之交易。既無別鋪可換。若將錢捆載遠行。又脚價不貲。勢不得不隱忍吃虧。所以連年賠折等語。臣博訪商情。所言實非支飾。惟因彼時市集錢價甚賤。勢難專事恤商。是以未敢具奏。現在各省錢法仰蒙

皇上俯鑒下情。停止鼓鑄。查繳小錢。並將兵餉滿支銀兩。錢價自必日漸增長。若不及此時將蘆東行銷賣錢量爲變通酌中更定。則不獨商情偏絀。辦課得有藉詞。且恐商力實有不支。勢必帑課民食均致貽悞。所關匪淺。節據蘆東兩運

司稟請酌劑前來。臣查各省鹽筋價值。如兩廣雲南湖廣江西等省例俱賣銀。河南一省食四省之鹽。現今銷兩淮之引地。每筋以銀定價。卽行銷山西之鹽。向亦定價用銀。惟蘆東引鹽專用錢文。是此一省中銷售鹽筋。銀錢本屬互異。臣愚昧之見。合無仰懇

聖恩俯準將蘆東鹽價。援照各省之例。一體改爲賣銀。查現行鹽價。長蘆每筋自十二文至二十三文不等。山東每筋自十一文至二十四文不等。除天津公口岸。仍照舊辦理外。應請照戶部制錢十文作銀一分定例。將鹽價十二文者。作

爲紋銀一分二釐二十四文者作爲紋銀二分四釐餘俱照此遞改。並請與民交易遇有整包發賣。攜銀來售者卽以銀交易。其零星買食需用錢文者。統照市價隨時合銀作算。用銀用錢仍聽商民兩便。市中銀錢長落人所共知。照各省現行成規。畫一辦理。臣仍督同運司等隨時查察。毋許稍有逾於定價之外。至將來錢價增長。銀隨時值亦並無偏輕偏重之殊。如此變通。民間食鹽價值並無增減。而商兌市僧居奇。易銀虧本之累。實爲兩得其平。如蒙俞允。從此蘆東商本保全。交帑完課。永遠可期。無悞。皆沐

聖主浩蕩鴻慈矣。臣詳細體察。不得不爲調劑。曾與直隸總督臣梁肯堂。山東巡撫臣福寧。札商意見相同。謹合詞恭摺具奏。奉

硃批。此奏似有所見。該部議奏。

乾隆五十九年十二月。鹽政徵瑞奏。爲場竈灘副被淹。請照例借給工本銀兩。以資修整事。切照本年夏秋之間。雨水較多。天津分司所屬豐財。蘆臺二場。鹽灘圈埝。悉被水淹。先經臣督飭場員設法疏消積水。并據竈戶籲懇循例借給修灘工本。當經批飭運司查勘明確。核實詳報去後。茲

據長蘆運司嵇承志詳報鹽灘逼近海濱地勢低窪六七
月間大雨時行衆水滙歸灘池圍埵被水淹浸若不及時
修整有悞明春曬鹽除有力之戶自行修理外其貧窳均
須借帑興修今分三等查照舊例有減無增極無力之戶
每工酌借銀十六兩次無力之戶每工酌借銀八兩稍有
力之戶每工酌借銀四兩計豐財場應修灘二百二十七
副需工本銀三萬二千一百六十八兩蘆臺場應修灘一
百三十四副需工本銀一萬四百四十八兩該二場共需
借工本銀四萬二千六百十六兩請循照歷次奏準借帑

修灘之例在於五十九年秋撥實存引課項下動支發給。照例分限六年完交。惟查乾隆五十四年該二場借領工本已完過四限銀兩。尚有兩限。應在今冬及明年冬間徵收請一併於現發銀兩按數扣除等情。具詳前來。臣查鹽財蘆臺二場產鹽最旺。關乎通綱歲額行銷。本年灘副被淹甚重。自應趕緊修整。以資興曬。竈戶貧乏居多。若盡令自行修理。勢必因循貽誤。今節省酌借實需銀四萬二千六百十六兩。仰懇

聖恩俯準照例於運庫存銀內如數借給。臣仍督催各竈上緊僱

夫修整無悞興曬窮查各竈被水之後家無蓄藏借數已
經節減修費亦非寬餘其今冬應還舊借自應於現發工
本內撥收若明年冬間應完之項先於今冬併捐是被災
貧竈反責令一年中完兩年之銀非所以仰體

聖主軫恤窮黎之意臣并請略爲展緩將舊借未完第六限工本
仍限明冬完交所有現借工本銀兩卽自六十一年冬間
起限照例分限六年每限完銀七千一百二兩六錢零按
限歸款庶灘副得免荒廢而竈力亦不致再形拮据矣臣
謹會同直隸總督臣梁肯堂合詞具奏奏入奉

硃批另有旨。欽此。

詳

諭旨。

嘉慶四年長蘆鹽政董椿奏覆。竊臣報雨摺回奉到

硃批。朕聞鹽價頗昂。民虞淡食。汝應如何調劑。據實覆奏。欽此。仰見我

皇上勤求治理。念切痼瘼。閭閻食用細微。無不上關

宵旰。臣跪讀之下。欽服難名。伏查長蘆鹽價。自康熙二十七年。計道路之遠近。腳費之多寡。酌定售賣原屬平價。迨後雍正六年。前鹽政鄭禪寶以商運消乏。奏請詳議。至雍正十年。總督唐執玉覆奏。應以康熙二十七年原定之數。作為

標準照部議每觔增制錢一文。乾隆二十九年。前鹽政高誠。因物價增長。鹽穰繩席。俱倍於昔。請增制錢一文。乾隆三十五年。前鹽政李質穎。以從前紋銀一兩。換制錢八百文。近年換九百八十九文。至一千一二十文不等。賣鹽錢文。易銀虧本。請增制錢二文。乾隆四十七年。前鹽政徵瑞。以成本加增。請加制錢二文。五十三年。前鹽政穆騰額。以易銀一兩。需錢一千一百餘文。錢賤賠折。請加制錢二文。自雍正十年起。至乾隆五十三年。統計六十年內。先後五次。共加增制錢八文。現在近處有賣制錢十一文者。極遠

有賣制錢二十三、四文者不等。卽如京師從前原賣制錢九文。今賣制錢十七文。雖一人食鹽每日不過三錢。然統而計之。爲數不少。誠如

聖訓鹽價頗昂。民虞淡食。臣受

恩深重。自應殫竭愚忱。欽遵調劑以副

情覆鴻仁。當經率同運司同興。傳集通網商衆。令將成本內一

切價值逐一核計。此中有應如何調劑。並可酌減者。詳加籌酌。務於無悞課運之中。仍得樽節以平鹽價。如鹽減絲毫之值。卽民獲絲毫之益。再三諭令妥籌去後。茲據該商

等覆稱。蘆東商人積久疲乏。更兼生齒日繁。百物昂貴。所
需鹽穰繩席。車船脚價。人工食用等項。無不加倍。又因各
引地賣鹽錢文。必需易換銀兩。方能折回交課。辦運無如
錢賤多年。轉運拮据。至商等一切交易用項。除課運之外。
不敢以自有之身家。博無益之浮費。如此兢兢自守。尙有
因賠折過重。辦運不繼。以致被參告退者。不一而足。因此
每至疲乏。隨有調劑之請。並於增價外。另有緩徵展限。借
帑等事。卽如五十三年增價後。自五十八九年。至嘉慶元
二等年。易換庫平紋銀一兩。需制錢一千二三百文不等。

長江圖志卷之六 第一二
各商賠折。至於力不能支。是以嘉慶二年。又經徵鹽政奏
請調劑。仰蒙

皇上將利過於本之舊欠七百餘萬兩。全行豁免。其餘應完帑
課。又自庚申年起。分十二限完交。又借給運本銀一百萬
兩。此實從來未有之

殊恩。一時疊沛。得此調劑之後。至今一載有餘。安心辦運。商等
沾沐

皇仁。至深且厚。苟能於成本內量爲節減。敢不稍平鹽價。以紓
民力。第緣蘆東各商懸欠帑課。除豁免之外。尚有一千一

百餘萬兩。此後每年連新帶舊。應完課帑餉利各項銀一百數十萬兩。至成本所用。又繁事事必需。無可節減。卽就目前暢銷情形。竭力營運。僅免貽誤。倘遇有轉運稽阻。行銷壅滯等事。不免又形竭蹶。若於此時商力未充。驟請減價萬一辦運遲悞。口岸乏食。完課不繼。交項有虧。卽將商等參革治罪。已於公事無裨。今孰籌調劑。惟有察看行銷引地各屬錢價。每兩回至一千文之時。再請量減鹽價。則商民兩受其益。種種下情。懇請鑒察等語。由司稟覆前來。臣伏思商人貿易。銷銖是較。未免專於爲己。不知變通。第

詳查舊案雍正年間卽稱消乏是該商等疲憊情形由來已久。前任各鹽政屢請加價自是不得已之舉。惟由漸而增。遂至積重難返。因思行鹽商人止於數百餘家而食鹽百姓奚啻數千萬億。若竟減定價值行令照數售賣於商。力所虧有限。大可獲利。民之益而所以不敢遽請試行者。誠恐商人資本微薄。或至辦運不前。事後更張。於帑課民食均有關係。臣再四思維。近年鹽價增昂之故。一由物價騰貴。一由錢賤賠折。在目今人民繁庶。物價固難望其減落。而易銀錢價斷無永遠賠折之理。溯查數年以來。每易

庫平紋銀一兩需制錢一千二三百文不等。今自嘉慶四年春間起遠近行銷各處每易庫平紋銀一兩止需制錢一千數十文至一千一百數十文不等。雖各屬錢價不一。然以錢易銀一節該商衆辦運已經漸有便宜。惟自春間至今爲期未久不敢援爲定準。且目下錢價之好亦僅能復還五十三年請加鹽價時數目。各商久受錢賤之虧。甫有轉機須得暫培元氣。查從前各項調劑之詰。僅止利商不能兼及便民。而現今錢價已有起色。實爲商民兩便機會。臣愚昧之見請將錢價察看一年。如日漸增長竟能從

前以制錢八九百文易銀一兩。則商力頗見寬紓。鹽價自應核減。即使嗣後錢價不能再長。僅在一千文光景。如果經年不復更動。亦可作爲標準。將鹽價量爲酌減。竝鹽錢數。既可減少。則鹽價不至終昂矣。至各處銀錢價值。地方州縣例有按月摺報。該商等不能稍有捏飾。一俟錢價定準。臣卽當酌減鹽價數目。奏請

聖訓奉

硃批所議是。錢價原無一定。鹽價一減。再加又難。總期商民皆便。無過不及。合乎中道耳。欽此。許

諭旨

嘉慶六年六月二十五日長蘆鹽政那蘇圖奏言查天津水勢自初九日消落數寸之後十一十二等日復又增長尺餘十四十五等日風雨交作水激浪湧將

行宮挑築隄埝汕刷滲漏院內積水尺餘房屋牆垣間有坍塌臣親往查看連夜多雇人夫趕緊加築搶護隄埝尙保無虞至天津府城西門外臨河之芥園教場一帶灘低受患舊築大隄一道爲防護津城扼要之處每年一交夏令豫行加高培厚以資防禦天津道府暨文武員弁駐工防守臣親赴大隄逐段查看現俱築土培高員弁梭織巡防

時加保護。惟天津爲衆水匯歸入海之地。現值海不收水。遊頂內河之水。又兼上游各河水日漸增長。以致泛溢。四鄉村莊田地。被淹較多。禾稼受傷。秋成難望。十八日自丑至午。大雨傾注。東南風緊。海河倒漾之水。漫溢府城南門。西門關廂。積水淹浸。居民奔避入城。各瓦樓止。現經天津道蔡齊明。知府楊志信。知縣沈長春等。設廠煮粥。急賑。其四鄉被淹村莊。已經該地方官分路查勘。亦卽量加撫卹。不致災黎失所。又據長蘆商人郭利和。江公源等。呈稱。商等直省引鹽。現查順天及河間天津等府。均受水患。運到

各州縣之引鹽多有淹沒。天津瑪鹽坨地晝夜加築搶護。無如河與隄埒。積水無從消洩。存坨鹽筋雨淋水浸。盪沒一萬六千餘包。河流湍急。糧船貨載均皆停泊守候。鹽船亦難涉險。挽運不得不將被水悞運情形。據實呈明等情。臣伏查引地運到之鹽。被水淹沒。天津存坨鹽包。又經淋浸傷耗。卽欲趕緊築運。而河流駛激。挽運維艱。被災悞運。勢所不免。隨飭運使伊勒圖將各府所屬衆商行運引地。並坨地被淹鹽包。逐一確查詳報。以憑核辦。臣正在繕摺具奏間。承準

廷寄欽奉

上諭。臣隨飭天津道府各員。將所有隄閘橋梁。妥爲防護。至低窪村莊。被水淹浸者。務卽設法疏消。加意撫卹。臣於拜摺後。卽率同天津道臣蔡齊明。前赴淀河海河一帶查勘。奏入奉

上諭。那蘇圖奏天津四鄉被淹成災。商鹽不能築運。自繫實在情形。著那蘇圖卽查明該商等引地坵鹽。被水輕重。應如何酌量加恩展限。分別具奏。詳諭旨。

嘉慶六年九月二十七日。那蘇圖奏言。竊照本年六月間。陰

雨連綿。河水漲溢。天津分司所屬豐財蘆臺二場灘副池
埝。悉被水淹。先經臣檄飭場員確實查勘。並督率竈戶等
設法疏消積水。隨據竈戶籲懇循例借給修灘工本。當經
批飭運司查勘明確。核實詳報。旋據運司轉飭勘明。將應
修灘副所需工本銀兩。分別酌定造冊詳請具奏。臣覆加
細核。緣該二場鹽灘。逼近海濱。地勢最窪。本年六月間。陰
雨過多。各河漫水下注。又兼海潮逆頂。通場灘副悉被水
淹。池埝衝打幾平。鹽根竟成淡水。灘坨存鹽。衝沒四十七
萬餘包。被災情形。實為數十年來所未有。查該二場產鹽

最旺。有關通綱歲額行銷。向年每逢灘副被災節經奏準借給工本修整。歷有成案。此次被災較重。若不大加修整。誠恐鹽灘荒廢。有悞興曬商運民食。所關非細。除查明有力之戶。責令自行修整外。其貧乏竈戶。無力自修。勢必因循遲悞。自應量爲酌借。請照乾隆四十六年之例。分爲三等。稍有力之戶。每工借銀五兩。次無力之戶。每工借銀八兩。極無力之戶。每工借銀二十兩。查豐財場貧竈應修灘一百五十四副。需工本銀四萬九千八百二十二兩。蘆臺場貧竈應修灘一百三十八副。需工本銀一萬四百八十

兩豐蘆二場共需工本銀六萬三百二兩合無仰懇

皇上天恩準照向例在於本年運庫徵收商課項下借給如蒙
俞允臣仍督催各竈戶上緊雇夫興修務期一律完整以資明
春勘曬所有

恩借銀兩請自嘉慶七年菜鹽後起照例分限六年完交每年
完銀一萬五十兩三錢三分三釐按限歸款庶戶力不致
拮据而灘副亦無荒廢得以廣產鹽勛商運民食皆可充
足益沐

皇仁於無既矣奏入奉

旨允行。

嘉慶六年六月二十八日。那蘇圖奏言。臣欽遵

諭旨。一面轉飭天津道府各官。將所有隄閘橋梁。加意防護。至
低窪村莊。有被淹浸者。迅速設法疏消。加意撫卹。一面同
天津道蔡齊明乘坐小船。由三岔河先至海河一帶查看。
緣該河並無隄岸。河西有疊道一條。石閘七座。近日上游
各河來水洶湧。宣洩不及。又因海潮逆流而上。倒漾湍流。
將疊道石閘。均被漫溢。二十一二等日。復同天津道蔡齊
明前赴定沙河一帶查看。所有南北運河定沙河及各處

旱路均被漫水接連。河旱道路不能分晰。各鄉低窪村莊皆被淹浸。總由數日以來。上游各河之水接連而下。兼之海潮頂阻。並非淤墊。不能宣洩之故。至天津地勢最窪。爲衆水滙歸之區。當此河流盛漲。惟有保護津城。安慰黎庶。最爲緊要。查西門外芥園大隄。現有同知吳之勤在彼晝夜駐工防守。築土加高培厚。幸保穩固。至西南兩門被水居民奔避入城者。現經地方官多擇寬敞廟宇。並於城上搭蓋窩鋪。安置棲止。臣與地方各官業經設廠煮粥。俾災黎口食有資。均屬妥帖。其各鄉村莊被水圍繞。未經奔避。

者亦經地方官派委員役。船載錢米。分路按戶散給。臣一
面恭詣

天后宮

海神廟虔誠默禱仰祈

皇上洪福。

神麻靈佑。河流宣洩。莫安黎庶。上慰

宸厪。又據商人任振宗查世興等稟稱。二十一日風狂雨驟。鹽
坵後隄李公樓一帶。水勢頓長數尺。隄埝登時漫溢。搶護
不及。斜衝入坵。衝去鹽包六十六塢。所有被衝鹽包數目。

一時不能查清。現在飭司確切詳查。造報到日。再行核辦。
奏入奉

上諭。被水災黎。自須安置棲止。妥爲賑濟。著那蘇圖於運庫閒
款項下。動用二千兩。急爲撫卹。實力辦理。所有被衝鹽包。俟
通行查明後。另降諭旨。詳 諭旨。

嘉慶九年正月。直隸總督顏檢等奏。豐財場竈戶灘副。商民
私典私租。酌議量減原價。勒限贖回。定例竈戶灘副。不準
商民典買。緣衆竈以曬鹽爲生。灘副乃其命產。不使流離
失業。以裕生計之意。今於寇蘭圃等控案。查出商民租典

鹽灘九十八副。內業經回贖者十副。其餘八十八副。繫自乾隆七年起。至嘉慶六年止。已歷數十餘年。訛據各竈。僉稱俱因一時貧乏。無力自贖。又未忍荒蕪灘業。故爾典給商民。徐圖回贖。無如日漸窘迫。歸業無期。伏思竈戶失業已久。今既查出。自應照例清理。以安竈業。惟內多赤貧之戶。勢難一時取贖。且商民違例典租。獲利已久。亦未便給還原價。該運使議請。以典灘年分之遠近。定回贖銀數之多寡。似尙平允。其在乾隆四十年以前典租者。得利已多。應量減原價三成。按七折取贖。四十一年至六十年者。量

減原價二成按八折取贖嘉慶年間典租者得利無多量
減原價一成按九折取贖準其先交一半價銀將灘副收
回下欠一半價銀分限三年於每年九十月間歸還先取
具戶首切實保結倘至期故意不交者著落戶首墊賠俟
該竈措齊時歸還如限內實不能還者著該場大使將灘
副掣回招募殷實竈戶將所欠三限典價代爲交清卽行
勘曬一俟本竈戶措齊典價仍許收回管業倘有始終無
力及孤獨無依之戶力難勘曬者另招有力竈戶承贖仍
令本竈立契當堂呈交如此分年酌減庶衆竈不致失業

而承典商民亦不致虧損原本洵屬兩有裨益此外有未經查出者限一月內各赴運同衙門首報亦照前議辦理倘始終隱匿並復行私租私典別經發覺卽將灘副契價一併撤出入官仍各治以應得之罪至商民違例租契託繫不知例禁并有繫租欠經手者已於寇蘭圃等控案題本內聲明準部議覆應毋庸再議謹合詞具奏經部議奏應如所奏辦理

嘉慶九年九月長蘆鹽政珠隆阿奏爲遵

旨詳察商情籌議調劑恭摺奏

聞仰祈

聖鑒事。切臣昨於差次叩覲

天顏。仰蒙

聖恩垂詢商情。臣謹將長蘆商人近年實在情形據實跪奏。隨

荷

聖慈著臣籌議調劑具奏。伏查商人以成本爲重。如鹽襪繩席
運脚等項。卽商人成本之需。自嘉慶六年被水後。鹽襪繩
席等項費用。因較前增至一倍及倍半不等。卽現在錢價
昂貴。商人以錢易銀。雖有盈餘。究不抵成本之賠折。總計

現年賠折成本之數。已及四十餘萬兩之多。惟冀從此屢獲豐年。原可於數年中籌回成本。然亦須資此商力。庶轉運得以稍紓。今查自本年起。又屢各項舊欠銀兩起限。每年除額交正雜各課銀兩外。交項驟增。當此成本賠折之時。幾覺難於調劑。茲蒙

恩諭。臣悉心籌畫。伏思長蘆漕務。疊沐

皇仁。已屬

恩無可加。又何敢復有展緩之求。稍稽

國帑。但查每年正課雜款帑利。並山東城工兩淮歸公各項

銀兩均須年清年款。以次清釐。若將舊欠照依原限並徵。商力實有未逮。所有嘉慶九十兩年帶完緩徵五年引課。銀四十二萬九千餘兩。本年應交銀二十一萬四千餘兩。此項既有分限緩徵名目。似可歸併後限項內。量爲從容。今查

恩緩十五限緩徵課餉運本銀五百四十五萬餘兩。繫自嘉慶十一年起。截至二十五年全完。如將前項緩徵銀兩歸入此項之內。自嘉慶十年至十八年九限每限擬交銀二十萬八千兩。緣此九年內每年有帶完城工准本二項銀

十五萬五千三百餘兩。是以將緩徵歷年課餉運本等項。畧爲減輕。迨至嘉慶十九年以後。城工淮本二項交清。再將緩徵歷年課餉運本等項。照數添交。每限擬交銀三十萬二千八百五十餘兩。如此均勻牽平。則分限款目。既無殊異之淆。而商力亦不至有急驟之累。計自嘉慶十年起。至二十八年止。掃數清完。比較原分之限。提前一年。展後三年。統計每年額交及分限銀數。悉無前後軒輊之虞。如此籌酌辦理。則商力稍紓。卽目前不敷之成本。亦得藉資轉運矣。臣由差次於初六日回至天津。當卽督同運使。

奏請木札木楚傳齊通綱各商宣示

恩諭衆商等咸知感激。僉稱商等疊荷

深仁。今因成本增昂。復蒙

聖慈軫恤。酌予調劑。實商等夢想不到。益沐

皇仁無旣等語。臣復加體察。繫屬實情。謹將分年分限款項數

目另開清單。恭呈

御覽。是否可行之處。出自

聖裁。爲此恭摺具奏。伏乞

皇上睿鑒

訓示遵行。謹奏。十二日奉到。

硃批另有旨。欽此。

詳

諭旨。

又奏言再查商捐參課一項繫前鹽政徵瑞奏準自乾隆四十八年起通綱每年按引交銀二錢彌補參退各商無著帑課嗣後每視撥補之數目定捐交之多寡遞有增減奏明在案今原分十五限課餉運本銀內有參商無著之款繫在參課項下撥補現經奏請自嘉慶十年起分限完交並計參課項下按年撥補無須二錢之多應請將八九兩年分商捐參課銀每引暫減一錢仍令捐交一錢嘉慶

十年各款起限。按年每引捐交銀一錢四分。足敷撥補。倘得稍有餘存。並可通融濟運。於商力更有裨益。謹附片奏

聞奉

硃批覽。欽此。